

# KGOGEDI KE ENG GODIMO GA THABA?



Dumela feela, dumela feela,  
Tšohle di a kgonega, dumela feela.

A re kobamišeng dihlogo tša rena bjale.

Tate Modimo, ye ke thapelo ya rena ya tlhokofalo bošegong bjo, ka go bona ka moka tše O di direlago batho ka letšatšing le. Gomme re kgopela Wena, Morena, a nke re dumele feela, re no dumela gore Ke Therešo, Lentšu le le ngwadilwego le dirwa go bonagatšwa go rena. Faa dilo tše, Tate.

<sup>2</sup> Bjale bošegong bjo re nyaka go leboga Wena ka—ka Seetša se O se lahletšego godimo ga Mangwalo bakeng sa rena mosong wo. Gomme re a rapela bošegong bjo, Morena, ka mothalong wola wa thapelo, gore O tla hlatsela Lentšu la Gago go ba Therešo.

<sup>3</sup> Re rapelela ka moka dikereke le diphuthego tše di kgobokanego go dikologa ye—ye—ye mennyane memaekorofoune ntle go kgabaganya, go tloga setšhabeng, tsela ka moka go ya Lebopong la Bodikela, godimo go ya dithabeng tša Arizona, tlase go ya ka melaleng ya Texas, tsela go ya ka Lebopong la Bohlabela, ka moka go kgabaganya naga, Morena, moo ba kgobokanego. Diiri tše ntši go arogana, re mo nakong, eupša, Morena, re mmogo bošegong bjo bjalo ka ngatana e tee, badumedi, re letetše go Tla ga Mesia. Re a rapela, Tate wa Legodimo, gore O tla Mo romela ka bjako Kerekeng ya Gago. Ka gore re se kgopela Leineng la Gagwe. Amene.

<sup>4</sup> Le ka dula. Ditumedišo tša Bakriste go ka moka ba le lego mo bošegong bjo. Ke kgopela tshwarelo gore re sa pitlagane le go katellana go fihla ge re sa kgone le go hema. Le ditšidifatša moya, ga mmogo le moya wo o tšidifaditšwego wa sona, ga o na le khuetšo ye kaalo, batho ba bantši kudu. Ge fao e be e no ba kereke ya mehlang e tletše batho, ditšidifatša moya tše o di be di tla le gatsetša. Eupša bjale yo mongwe le yo mongwe o na le sefothedi, se a fothela, gomme setšidifatša moya se budula ka maatla ka fao se kgonago.

<sup>5</sup> Re romela madume go tšwa Lebopong la Bohlabela go ya go la Bodikela, go bagwera ba rena ka moka ka go Kriste, bao ba theeditšego ka gare. Re romela madume godimo ka San Jose, Ngwanešu Borders, sehlopha godimo fao. Re romela madume godimo ka dithabeng, Prescott, Arizona, go Ngwanešu Leo Mercier le sehlopha sa gagwe seo se lego godimo kua se letetše go Tla ga Morena. Re romela madume go bao ka Tucson, bao ba kgobokanego bošegong bjo, ba letetše go Tla ga Morena. Tlase

go ya ka Houston, Texas, go bao ba letetšego go Tla ga Morena. Godimo ka Chicago, go bao ba letetšego go Tla ga Morena. Godimo Lebopong la Bohlabela, New York le Connecticut, le dihlopha tše kgolo godimo fao, tšeo di letetšego go Tla ga Morena. Ga re na le kamora mo go ba dudiša, ka fao re swanela go ba romela Lentšu ka—ka mokgwa wa mogala. Re romela madume go Ngwanešu Junior Jackson bošegong bjo, le sehlopha sa gagwe tlase ka Clarksville. Ngwanešu Ruddell, godimo go masomeshela-pedi, le sehlopha sa gagwe, se letetšego go Tla ga Morena. Gomme re kgobokane mo bošegong bjo ka kerekeng ya gae, tabarenekele, re letetše go Tla ga Morena.

<sup>6</sup> Gomme bjale, bontši bja lena mohlomongwe le be le se tirelong mosong wo. Eupša ke a tshepha gore yo mongwe le yo mongwe, yo a bego a se gona, o tla hwetša theipi yela, ka gore ke a dumela gore e be e le Molaetša wa go otlologa kudukudukudu go kereke ge e sa le go tloga go—go Molaetša wa *Bahlomphegi, Ke Nako Mang?* Ke ikwetše tlotšo ya Moya, ke ikwetše ke hlahlwa go bolela seo ke se dirilego. E be e le wo motelele, eupša go le bjalo ke ikwetše ke hlahlwa go o dira. Gomme ke nagana gore Morena, ka Lentšu la Gagwe, o laeditše iri ye re phelago ka go yona. Gomme o dira nnete gore re kwišiša dilo tše tša sephiri tše di diregago. Le a tseba, Beibele e rile, “Ba bohlale ba tla kwišiša.”

<sup>7</sup> Eupša ditšhaba le batho ba tla gola go ba “bafokodifokodi le bohlalehlale.” E nong go nagana, Moamerika wa magareng bjale o mengwaga ya magareng, a ka ba masomepedi a mengwaga ka bokgale, mofokodifokodi eupša yo bohlalehlale. Ba be ba se na le difofane tša ditšete ka go wona matšatši, le—le dibetša tša ntwa tša othomiki, eupša ba be ba phela botelelele. Re ba bafokodifokodi le ba bohlalehlale, gomme bohlale bja rena beng ke bjona bo yago go re fediša. Re tla iphediša ka borena. Modimo a ka se ke a re fediša; bohlale bja rena bo tla re fediša. Ka mehla go bile bjalo, gomme ka fao go tla ba gape.

<sup>8</sup> Bjale, ge Morena a rata, Lamorena le le tlogo mosong, ga ke tsebe bjale gore ke ya go bolela ka eng, eupša ke a tshepha gore Morena, ge A ka re dumelela go phela gomme gwa se direge selo, gomme ge e tla ba thato ya Gagwe, re nepile go bolela ka Molaetša wo mongwe Lamorena le le latelago mosong, re be le thapelo ya balwetši Lamorena le le latelago bošego. Ka gona e wetše go nna kudu go bowa morago gae go ya Arizona, go tšea lapa morago gore bana ba kgone go ngwadiša sekolong. Ka gona le... Re tla le tsebiša, ge feela re kgona, ka dikopano ge di butšwe, goba dinako gore re... mafelo ao re ikemišeditšego go ba. Ka fao, Modimo a le šegofatše ka moka.

<sup>9</sup> Bjale bošegong bjo, ka go tseba gore ke...ke latetšwe ka metsotso ye lesometlhanano, go thoma, kotara go fihla go seswai mo ka Jeffersonville; gomme e ka ba kotara go ya go senyane

ka Lebopong la Bohlabela, gomme e ka ba iri ya bohloko ka Lebopong la Bodikela. Ka fao bjale re ka ba go dikela ga letšatši mo. Gomme ke nyaka go bolela le lena lebakana la tirelo ya seripana, go leka go hwetša tlotšo ya Moya, gomme ka gona ke bitše llaene ya thapelo.

<sup>10</sup> Gomme ke nyaka phuthego mo, ga mmogo le phuthego ye e kgobokanego mafelong a mangwe, e hwetše monna yo a itšego, ngwanešu yo a tloditswego ka Moya; gomme ge re thoma go rapelela balwetši, a ye a bee diatla godimo ga bao ba lego ka phuthegong ya lena. Elelwang, Modimo ke motlalagohle; O mo gohle. Ka fao, tlase ka Texas, godimo ka California, godimo ka Arizona, kae kapa kae mo le lego, beang diatla godimo ga bao ba babjago ge re thoma go rapelela balwetši. Gomme ke na le nnete gore Modimo o tla kwa gomme a araba thapelo.

<sup>11</sup> Selo sa go setlwaele, Lamorena la go feta bošego, gomme tlotšo e be e eya pele, gomme Moya wo Mokgethwa . . . E be e le selo ka nnete. Ga se ka ba le—le llaene ya go lekola lebaka la dikgwedi le dikgwedi, go tloga mola ke bego ke le mo nako ye nngwe. Gomme ka gona go sepelela godimo kua ka fase ga tshephišo . . . Ga o tsebe gore O tla e dira. O ka se kgone go bolela gore O tla e dira. O swanetše go no sepelela godimo kua gomme o lete. O ikeme. O dira se A se nyakago. Eupša ema fao gomme o lete go bona se A tlogo go se dira, ka gona Se kwe ge a thuba go kgabola go wena ka mokgwa woo.

<sup>12</sup> Gomme mafelelong a—a kopano, ke sa tsebe gore e be e le mang, eupša fao go be go le—le monna felotsoko go bapela llaeneng yo e bego e le yo motelele, gomme a na le lefatla ka godimo, gomme e be e le motho yo a babjago kudu.

<sup>13</sup> Gomme ka gona thwi la mafelelo, fao go bile monna a tšwelela mo sefaleng, gomme a na le hlogo ya gagwe e inametše fase, gomme a bonagala o ka re o be a ekwa bohloko, a itshwere ka boyena go dikologa mpa. Gomme ka gopola gore e swanetše go ba monna yola wa pele goba monna wa bobedi, goba e ka ba neng nkilego ka mo rapelela, ka baka la gore o be a na le lefatla gomme a swaretše hlogo ya gagwe fase; monna yo mogolo, a emetše godimo. Eupša ka lebelela go dikologa gomme ka hwetša mokgomana a dutše ntle fao, eupša o be a thakgetše. Ka gopola, “E kae?” Ke be ke sa kgone go tšea sephetho gore e be e le kae. Ke be ke kgona go e kwa gomme ke bona monna pele ga ka.

Ka e kwa e goga go dikologa ka tsela ye, gomme e be e etla morago. Ka lebelela Ngwanešu Neville le ba ba babedi ba ba dutšego mo, e be e se bona. Ka re, “Monna o ka gare ga bokolobetšo bjola morago kua.” Gomme a le a tseba gore e be e le mang? Ngwanešu Shepherd. Lebaka leo ke sego ka kgona go mo lemoga, o be a dutše morago kua ka hlogo ya gagwe e obamišitšwe, a rapela.

14 O be a gopola gore o be a eya go hwa, o gopotše seo dibeke di se kae tša go feta. Mosadi wa gagwe o mmoditše gore a ye a hwetše para ye mpsha ya dieta, gomme a re, “Nka se di nyake. Nka se ke ka ba mo botelele.”

15 Gomme o kopane le nna letšatši le lengwe ka . . . godimo kua ka jarateng, ya Ngwanešu Wood, a goelela a tumiša Modimo. A re, “Ke ja kolobe, mae, ditamati, eng kapa eng ke e nyakago.”

16 Gomme ka go kokobela a tlogela setulo sa gagwe, a ya morago ka kua ka ntle ga tsela, le go rapela. Le a bona, ga o nyake karata ya thapelo, o nyaka feela tumelo. Le a bona?

Bjale, ke be ke sa tsebe ge eba o be a fodišitšwe goba aowa, ke nno re, “Mo—monna, yo a rapelago, o na le selo se sengwe se fošagetše.” Ke nagana Bo bitšwa se e bego e le, “Bothata bja teng, gomme o rapela morago mo. Morena Jesu o go dira gore o fole.” Bjale, se ke ka moka ke kgonnego go se bolela. Kgogedi ke gore o be a rapela. Ke kgonne go e bona, eupša gore go diregile eng ga ke tsebe. Le a bona?

17 Eupša ge le Le kwa le etla morago, yo mongwe le yo mongwe o a lemoga, ge Le re, “GO RIALO MORENA,” le a bona, yoo ga e sa le nna ke bolela gape nako yeo; ke Yena.

18 Eupša ka mehla Ke re, “Jesu Kriste o go dirile go phethega,” seo ke Therešo tšwa. “O hlabilwe ka baka la a rena mabokgopo, ka megogoma ya Gagwe re fodišitšwe.” Le a bona? Le a bona?

19 Eupša ge Le etla, “GO RIALO MORENA,” gomme la go botša gore o dire eng le seo se yago go direga, hlokomela seo, se tla ba ka tsela yeo.

20 Eupša ge ke re, “Jesu Kriste o a go fodiša gomme o go dira gore o felele,” o a le dumela, ka baka la gore O šetše a le boletše. Ke no bušeletša se A se boletšego.

21 Gomme pono e no bušeletša se A se laeditšego. Le a kwišiša?

22 Bjale a re ka itlhaganela gomme re yeng thwi ka Lentšung, ka baka la gore ke a tseba gore ba bantši ba lena le mo, le na le dimaele tše telele go sepela bošegong bjo. Ke a rapela gore Modimo o tla le šegofatša, a le thuše le go le šegofatša go bapela ditseleng. Gomme bjale ke rata go phetla go Mokgethwa Mateo bošegong bjo, ya 21 tema, ditemana ya 1 go fihla go 11, ka go Mokgethwa Mateo. Gomme, bjale, ge o se na le Beibele ya gago, goba o nyaka go ngwala Mangwalo a fase, ka moka gabotse.

23 Gomme bjale go lena bao le sego la kwa Molaetša mosong wo, gomme le na le segatišatheipi; ga re nyake, go rekiša theipi. Ga re nyake, go rekiša eng kapa eng. Ka dinako tše dingwe ka kopanong ye kgolo ba tla bega gore ba na le dipuku tše dingwe morago kua; ga re dire le ge e ka ba eng go tšwa go tšona.

Ngwanešu Vayle ke mongwadi. Ditheipi, monna yo a dirago kgwebo ya theipi kua o tla le botša, ga re dire tšhelete ya theipi. Ga re. . . Ga se “ditheipi”; ke Molaetša. Ge monna a hwetša ka monaganong wa gagwe gore ke tšhelete, ga a ye go dira ditheipi gape. Yeo ke therešo. Ke be ke botšiša ka yona, ke a nagana ditheipi tša rena di rekišwa e ka ba, ka fase ga ditolara tše tlhano, goba selo se sengwe, tharo go ya go tlhano, goba selo se sengwe se sebjalo. O reng? Tharo; le nne, go tše kgolo, tše telele ditheipi.

<sup>24</sup> Gomme modiredi yo a itšego, ke botšišitše ka ye tee ya ditheipi tša gagwe, gomme e be e le ditolara tše senyane, e ka ba metsotso ye masomepedi goba masometharo, ya molaetša.

<sup>25</sup> Ka fao ke a bona gore Ngwanešu Sothmann morago kua ga a hume, goba yo mongwe wa bona, ka ditheipi tše ba—ba di beago ntle. Le a bona, ba no dira go lekane go ya pele ka yona. Nka se kgone go ba kgopela go di direla lefeela, ka baka la gore ba swanetše go reka ditheipi le se sengwe le se sengwe gape. Gomme motšhene o a tura kudu, o bitša e ka ba dikete tše lesome tša ditolara go o thoma gore o dire ditheipi tšeo, sa mathomo.

<sup>26</sup> Bjale, ke a kwišiša ka pela ke. . . e begile bjale. Eupša fao go na le go kwa theipi gape. Ga kae ka mehla re. . . bahlokamedi ba ditšhelete, ga ke na le selo go dira le yona le gatee. Ebile ga ke. . . ga se ka ke ke eba ka go e tee ya dikopano. Ga se—ga se go hola motho. Ba buša ditšhišinyo tša bona; bahlokamedi ba ditšhelete ba tšea sephetho sa gore monna yo a latelago ke mang yo a swanetšego go dira ditheipi, gomme ba mo romela lengwalo. Seo ke ka moka ke se tsebago ka yona. Ba hlokomela seo, ka baka la gore ga ke kgone le go no gafela masea ga ke sa bolela ka go hlokomela ditheipi, ka fao, goba go kolobetša.

<sup>27</sup> Ka fao ke na le monagano wa ka o dutše godimo ga Molaetša, wo ke Kgogedi yela ya Boraro, gomme ke wo motee wo ke swanetšego go o botagalla le go o fa tlhomphokgolo.

<sup>28</sup> Mateo 21:1 go fihla 11. Ke boletše gore le ka kgona go hlokomela go. . . goba go phetla Mangwalo.

*Gomme ge ba. . . Gomme ge ba batamela kgauswi le Jerusalema, gomme ba etla Bethefage, go ya thabeng ya Mehlware, . . . Jesu a roma ba babedi ba barutiwa ba gagwe,*

*Gomme a re go bona, Yang ka motseng wo le lebanego nawo, gomme ka go otlologa le tla hwetša pokolo e tlemilwe, e na le pokolwana: le di tlemolle, gomme le di tliše go nna.*

*Gomme ge motho yo mongwe a le botšiša, le tla re, Morena o a di hloka; gomme ka go otlologa o tla di romela.*

*Se ka moka se dirilwe, gore go phethagatšwe seo se boletšwego ke moporofeta, ge a re,*

*Botšang barwedi ba Tsione, Bonang, Kgoši ya lena e tla go lena, e le yo bonolo . . . e dutše godimo ga pokolo, le pokolwana namane ya pokolo.*

*Gomme barutiwa ba ya, gomme ba dira ka mo Jesu a ba laetšego.*

*Gomme ba tliša po—pokolo, le pokolwana, gomme ba bea diaparo tša bona godimo ga tšona, gomme ba mmea fao godimo.*

*Gomme lešaba le legolo kudu la ala diaparo tša bona ka tseleng; gomme ba bangwe ba rema makabe go tšwa mehlareng, gomme ba ala ka tseleng.*

*Gomme lešaba le le bego le eya pele, le ba ba bego ba latela, ba goelela, ba re, Hosiana go morwa wa Dafida: Go šegofadišwe yo a tlogo ka leina la Morena; Hosiana magodimongdimongdimong.*

*Gomme ge a etla ka Jerusalema, ka moka toropokgolo ya šišinyega, ba re, ke Mang yo?*

*Gomme lešaba la re, Yo ke Jesu moporofeta wa Natsaretha wa Galelia.*

<sup>29</sup> Bjale ge nka tšea hlogotaba go tšwa go leo, e ka bago metsotso ye masometharo pele llaene ya thapelo e thoma, ke rata go tšea ye go ba hlogotaba: *Kgogedi Ke Eng Godimo Ga Thaba?*

<sup>30</sup> Bjale, e bile la go lapiša, la go tšhoša letšatši, gomme e be e le letšatši leo le sego la tlwaelega. Re hwetša Jesu mo a etla godimo Jerusalema, a loketše go tsenela paseka. Gomme paseka ke moo kwana ya paseka e bego e bolawa, gomme madi a be a alwa godimo ga setulo sa mogau go—go boelanya ba—batho. Gomme O be a etšwa godimo Bethefage gomme a tla ntlhoreng ya Thaba ya Mehlware, yeo e okametšego fase tlase go thaba ye nngwe ye nnyane fao Jerusalema e bego e agilwe. Gomme ge A lebelela, gomme a tseba gore yeo e be e le ketelo ya Gagwe ya mafelelo.

<sup>31</sup> Ye e be e le nako ya ge A be a tla gafelwa ka diatleng tša banna ba go tlala sebe gomme ba be ba tla Mmolaya. O be a tla hwa lehu le lešorošorošoro leo le kilego la hwiwa ke ba ba hwago, gomme a bolokwa. O be a tla ekiwa ke ba Gagwe Mong, ba bangwe ba bona ba ba emego thwi le Yena. Gomme Yena, e le Modimo, o be a tseba se se bego se le ka dipelong tša bona, gomme a tseba go tloga mathomong yo a bego a tla Mo eka. Gomme o be a tseba gore monna yoo o be a na le Yena yo a bego a dula lehlakoreng la Gagwe gomme a bala tšhelete ya Gagwe go Yena, le go ya pele, o be a tseba gore monna yoo o be a eya go Mo eka. Gomme o be a tseba gore sefapano se sebe sa Baroma se be se Mo letetše kua ntle. O be a tseba gore meetse a Gagwe ka mmeleng wa Gagwe le Madi a mmele wa Gagwe a be a tla arogana, le gore Madi ao a be a tla rotha go tloga

phatleng ya Gagwe, marotholodi a magolo bjalo ka mphufutšo. O be a tseba ka moka tše di bego di le pele ga Gagwe. Gomme O ema godimo ga thaba, o lebelela godimo ga Jerusalema.

<sup>32</sup> Batho ba letšatši leo, lona . . . seo ba bego ba bitša letšatši leo, “mohuta wo mokaonekaone wa batho ba bodumedi,” ba be ba Mo hloile. Dikereke tša letšatši leo di be di Mo hloile gomme di Mo latotše, le go latola ka moka ba ba bego ba Mo theetša. Gomme ge ba ile go tsenela dikhampeine tša Gagwe, ba be ba kgaolwa ka bjako go tšwa kopanelong ya kereke. Ga go makatše ge Lengwalo le rile, “O tlile go ba Gagwe Mong, gomme ba Gagwe Mong ga se bake ba Mo amogela.” Ba batee bao ba bego ba swanetše go ba ba Mo ratile, bao ba swanetšego go ba ba bile le Yena, e bile a Gagwe a bohlokohloko, manaba a bohlokohloko.

<sup>33</sup> Gomme O be a dirile sehlopha sa Gagwe se sennyane go tšwa go sehlopha sa batho ba badiidi, banna ba go thea dihlapa, bakgoboketši ba lekgetho, ba go se rutege. Beibele e boletše gore ba bangwe ba bona ba be ba sa “tsebe selo, ba go se rutege.” Ba bangwe ba be ba sa kgone le go no saena leina la bona. Ga se a ke a ya dikerekeng go hwetša batho ba Gagwe.

<sup>34</sup> Gomme Yena ga se a ke a dumelana le yo mongwe wa baetapele ba dikereke. Gomme, ntle le seo, O latetše wona mkgwa wa moporofeta. O be a sola selo se sengwe le se sengwe se ba bego ba se dira, bjalo ka ge ba ba bilego pele ga Gagwe ba dirile; ka baka la gore ba be ba le karolo ya Lentšu, gomme O be a le Lentšu ka botlalo bja Lona.

<sup>35</sup> Eupša bogareng bja yona ka moka, go kgabola lebaka le lengwe le le lengwe le moporofeta yo mongwe le yo mongwe yo a bilego gona goba a sa tlilego go ba gona, fao go ya go ba palo ye e itšego ya batho yeo e kgethetšwegopele go kwa Molaetša woo, gomme ba tla O latela. Bao ba hlokomologa mašaba. Ba hlokomologa tshwaswalatšo ya yo a sa dumelago. Ga—ga ba na le go ngangišana le bona. Ba na le selo se setee go se dira, seo ke go dumela le go hwetša karolwana ye nngwe le ye nngwe ya Wona ba ka kgonago, go O nweletša ka gare go swana le Maria yo a go dula maotong a Jesu.

<sup>36</sup> Gomme Martha o be a Mo lokišetša matena, gomme Jesu a re go yena, “Eupša, Martha, o tshwenyega kudu ka dilo tša bophelo, eupša Maria o nyakile dilo tše kaonekaone,” le a bona, dilo tša Bophelo bjo Bosafelego.

<sup>37</sup> Bjale, re a hwetša gore ba bantši ba batho ba ba ilego ba kwišiša . . . Ba be ba se na le dingwalwa bjalo ka ge re na le tšona lehono, ba be ba se na le thelebišene goba thelefomo, goba eng kapa eng, sa letšatši leo, eupša ba be ba no kwa phefšana tikologong gore O be a eya go ba gona pasekeng. Ka gore ba bantši ba batho, ka go ba le monagano wa

semoya, ba be ba tseba gore O be a le Kwana yeo ya paseka, ka baka la gore O be a šetše a ba boditše dilo tše di bego di eya go direga.

<sup>38</sup> Gomme ka gona, go le bjalo, ka go tseba gore O be a eya go ba fao, le go Mo rata ka tsela yeo ba bego ba dira, ba be ba Mo letetše. Fao go be go le lešaba leo go lego molaleng gore le be le kgorometša, le šutha go tloga kgorong ye tee go ya go ye nngwe ye tee, ba hlokometše ntle ka tsela ye nngwe le ye nngwe, ka gore ba be ba tseba gore ye tee ya diiri O be a tla tšwelela. Ba be ba hlokometše.

<sup>39</sup> Ba bangwe ba be ba makala gore molato e be e le eng ka batho ba ba kitimago go tloga kgorong go ya kgorong. “Kgogedi ke eng?”

<sup>40</sup> Gomme ba be ba lebelela ka tseleng *ye* le go lebelela ka tseleng *yela*, go hwetša. Go be go bonala o ka re ba be ba lebeletše selo se sengwe, ka tlase ga tetelo ya selo se sengwe se yago go direga.

<sup>41</sup> Oo, ka fao ke nyakago go fetola hlogotaba ya ka metsotso e se mekae gomme ke bolele se, yeo yeo ke ye e lego taba lehono. Batho ba ba Mo lebeletšego gore atle ba ka tlase ga tlhologelo ye kgolo le ditetelo. Re kgona go e kwa, kgatelelo. Gomme ba a nyaka, ba hlokometše mosepelo wo mongwe le wo mongwe le leswao le lengwe le le lengwe, ba le bapetša le Mangwalo.

<sup>42</sup> Gomme ge ba bone dilo tšeo ka moka tšeo di boleletšwego pele ka Yena, thwi godimo go fihla mafelelong, ba tsebile gore bofelo bo be bo le kgauswi. Ba be ba nyaka go ba fao, ka fao ba hlokomela. Karolo ya mašaba e be e ema le Yena, ba ba sego nene. Ba bangwe ba be ba le kgahlanong le Yena, bontšintši bja bona, masomesenyane a peresente e be e le kgahlanong le Yena.

<sup>43</sup> Gomme yeo ke tsela ye e nyakilego go ba ka yona lehono ka mašabeng a bodumedi, ge ka nnete go etla fase go Lentšu le Kriste, fao go feela e ka ba peresente ye tee ye e tlogo go Le dumela. Karolo ye nngwe e ka se bee šedi ye e itšego go Lona, go sa kgathalege gore go dirilwe eng, ba tla lahlela mohuta wo o itšego wa motlae goba ba fošetša dikwero ka Lona. Go no swana. Nako, dilo ga di fetoge kudu, histori e ipoletša ka boyona go dikologa.

<sup>44</sup> Go lokile, re hwetša seo se goga ngangego ya megalatšhika. E swanetše. E swanetše go dira seo. Ba be ba letile, ba be ba makala seo A bego a tla se dira ge A fihla fao. Ba be ba nyaka go ba fao go hwetša eng kapa eng A bego a ka se dira. Ba be ba Se nyaka. Ba be ba nyaka go Se bona. Ba be ba Mo dumela. Ba bangwe ba be ba kwele gore O be a etla, gomme ba ile godimo kua go dira metlae ka Yena. Ka fao ka morago ga tlhologelo ya go tšhoša, letšatši le e sego la mehleng kudu, nako ye e sego ya mehleng kudu, dikereke di robetše, megalatšhika ya batho e eme mantsara, fao go be go le batho ba bantši, gomme ka gona ya direga!



45 Ka godimo ga ntlhorana ya Thaba ya Mehlware go tla ye nnyane, ye tšhweu pokolo e a tla, e sepela go theoga thaba, le sehlopha sa batho ba goelela ka lešumatho, ba mutlula matlakala a mopalema go tloga mehlareng, ba lahlela diaparo tša bona ka tseleng, ba goelela, “Hosiana go Morwa wa Dafida yo a tlogo ka Leina la Morena!” Po... mmoula wo monnyane wo, Monamedi wa wona e be e se yo mongwe ge e se motlotšwa wa Modimo Mesia wa iri.

46 Modimo, nako yeo, O be a dira eng? Ke eng kgogedi yela godimo kua thabeng? Ke Modimo a dira histori, gomme Modimo a phethagatša seporofeto. Gomme seo ka mehla se hlola kgogedi. Se tliša baswaswalatši ka moka godimo, manong (tša Molaetša wa mosong wo), gape le dintšhu. Le a bona? Ba tla mmogo go hwetša gore go direga eng. Ba bangwe ba tlela go fišegelwa, ba bangwe ba tlela go hwetša diphošo, ba bangwe ba tlela go swaswalatša. Fao go mehuta ka moka e kgobokane, bjalo ka ge re boletše mosong wo: badumedi, badumedi ba go itiriša, le ba e sego badumedi. Ke eng se se lego thabeng? Seporofeto se a phethagatšwa. Bjale re tla bona gore go direga eng.

47 Bjale, ka Pukung ya Sakaria, ka go ya 9 tema le ya 9 temana. Sakaria, yo motee wa baporofeta, o boletše ka Moyeng, o bolela se.

*Hlalalang gagolo, O barwedi ba Tsione; goelelang, O barwedi ba Jerusalema: bonang, Kgoši ya lena e tla go lena: ke moloki, . . . o na le phološo; yo bonolo, gomme o nametše godimo ga pokolo, godimo ga pokolwana, pokolwana namane ya pokolo.*

48 Bjale, bothata e be e le eng ka bale ba mangwalo? Molato e be e le eng ka baprista bale? Molato e be e le eng ka batho bale ba bodumedi? Se se be se ngwadilwe mengwaga ye makgolonne le masomeseswai-šupa pele se se direga, ka moporofeta yo a hlatsetšwego, ebile se beilwe ka dingwalong gomme sa bitšwa Beibele, disekorolo tša Tastamente ye Tala. Ka baka la eng ba be ba sa kgone go bona gore seporofeto seo se be se phethagatšwa? Lebaka le le swanago ga ba kgone go se bona lehono. Ba tšere Lentšu la Modimo ba Le dira la go hloka-khuetšo go batho, ka go ruta (ditšo) Thuto ya ditšo tša monna.

49 Ge wa lengwalo, bareri, badiredi, monna wa semoya (yo a bitšwago bjalo), bao ba tloditšwego, ba tla bala Beibele fela, bao ba be ba ka se makale ka se se diregago, ba be ba tla tseba gore Ke eng. Modimo o phethagatša Lentšu la Gagwe!

50 Histori e be e dirwa, seporofeto se be se phethagatšwa. Phološo lefaseng e be e fihla, letšatši le legolo leo baporofeta ka moka ba bego ba lebeletše pele go lona. Ka moka ba ba bego ba le ka lebitleng ba be ba letetše letšatši le (nna, nagana ka yona), ka moka ba ba bego ba hwile, ka moka go loka ga madi a bahwelatumelo le baporofeta.

51 Bao, A bego a sa tšwa go goellela ntle, “Jerusalema, O Jerusalema, wena yo a kgatlilego moporofeta yo mongwe le yo mongwe yo Ke go rometšego yena ka maswika, le go bolaya baloki, ke gakaie Ke bego ke go alamela bjalo ka sethole ge se be se dira, go mantswiana a sona, eupša ga se wa nyaka. Eupša bjale iri ya gago e tlile.”

52 Selo se sengwe le se sengwe se se bego se le ka lebitleng, Abraham, Isaka, Jakobo, ka moka baporofeta, ba be ba letetše iri ye.

53 Gomme kereke e be e foufetše go Yona. “Ke mang yo a hlalago ka moka lešata le? Moisa yo ke mang?” Nako ye nngwe ba rile, “A ga se morwa wa mmetli yola godimo mo? Re a Mo tseba. O tšere kae bohlae bjo? Ka baka la eng, ga re Mmone a kgokagane le se sengwe sa dikolo tša rena. Ga re tsebe dipuku tše di itšego A kilego a ithuta go tšwa go tšona. Ke Eng?”

54 O be a le karabo ya seporofeto sa moporofeta. Šo O a tla, a nametše pokolwana ya pokolo. A kgogedi! Modimo o be a phethagatša Lentšu la Gagwe le le tshephišitšwego, iri ye e bego e letile lebaka la makgolonne a mengwaga. Ka go Genesi, ya 3 tema gomme ya 15 temana, Modimo o dirile go bolellapele, “Peu ya mosadi e tla pšhatla serpente hlogo, eupša hlogo ya gagwe e tla pšhatla serethe sa gagwe,” seporofeto seo go theoga go kgabola Beibele se be se bolella pele ka Monna yo a etla.

55 Gomme mo e sego kgale feela fao go be go le moporofeta yo a emetšego godimo magareng ga bona, yo e bego e le moporofeta yo a hlatsetšwego, Sakaria, gomme o boletše, gore, “Lena barwedi ba Jerusalema le lena barwedi ba Tsione, hlalalang, goeelang, goeletšang, ka baka la gore Kgoši ya lena e tla go lena, ke yo boleta le yo bonolo le wa go kokobela, o nametše godimo ga pokolwana ya pokolo.”

56 Gomme mo batho bao ba balago Lengwalo leo, letšatši ka letšatši, ba Mmogetše a etla a nametše go tsena, gomme ba goelela, “Ke mang yo?” Le a bona? Modimo a phethagatša Lentšu la Gagwe go batho bao ba bego ba swanetše go ba ba tsebile gore Le be le le eng, eupša ga se bake ba Le tseba.

57 Ge Modimo a phethagatša Lentšu la Gagwe, ka mehla Le hlola kgogedi, ka mehla le a dira. Le hlola kgogedi, ka gore Ke le le sego la tlwaelega. Ga se gwa tlwaelega, ge A phethagatša Lentšu la Gagwe go motlwae wa sebjalebjae wa letšatši, ka baka la gore motlwae wa sebjalebjae wa letšatši ga o Le dumele. Ba na le tsela ya bona beng.

58 Bjale, re a bona, bjale a re yeng morago ka Mangwalong gomme re tšeeng tše dingwe tša ditiragalo tše di sego tša tlwaelega, metsotso e se mekaie feela, ge Modimo a be a phethagatša seporofeto sa Gagwe. Ge Modimo a bolela eng kapa eng, O ya go se dira. Ka moka magodimo le lefase di tla

feta, eupša Lentšu lela le ka se tsoge la kgona go feta. Ka fao ka mehla Le hlola lefelo la tiragalo, lefelo la tiragalo le le sego la tlwaelega.

<sup>59</sup> Elang hloko ka fao Lentšu la Modimo le nyefolegago go—go batho bao ba bego ba swanetše go Le dumela, eupša gomme go le bjalo Lona ga le tlwaelege mo e lego gore ba a goelela, “Go lokile, ke eng se? O hweditše kae selo seo? Ke mang yo? Ke eng se?”

Ge, ba swanetše go be ba goelela, “Hosiana go Kgoši ye e tlogo Leineng la Morena!” Eupša fao go be go no ba sehlopha se sennyane se dira seo, sehlopha se sennyane feela.

Go seporofeto sa mengwaga ye diketenne, ya selo se segologologolo se se bego se ka kgona go diregela setšhaba, ka gore ka moka kholofelo ya bahu e be e khutšitše godimo ga Sona, bokamoso ka moka bo be bo robetše godimo ga Sona; gomme batho ba bodumedi, bao ba bego ba tleleima gore ba a Se dumela, ba be ba goelela, “Ke Eng? Gomme kgogedi ye ke eng?” Selo se sengwe seo se sego sa tlwaelega! E ka ba go swana, se no se fetoge, bjale sa go se tlwaelege.

<sup>60</sup> A re boneng tše dingwe tša dilo tša go se tlwaelege, bjalo ka ge ke sa tšwa go bolela. Kgogedi e be e le eng feela pele kahlolo e ratha lefase gomme e le fediša ka meetse? Mokgalabje, tikologong ya bo lekgolo le masomepedi a mengwaga ka bokgale, a aga sekepe ge fao go be go se meetse ao se tlogo go phaphamela ka go wona. Godimo kua mengwaga, a eme ka mojako, a aga bokagare, ka gare, a e manega ka gare le ka ntle, gomme a re, “Lefase le ya go metšwa ke meetse,” lebaka le legolo la saentshe.

<sup>61</sup> “Ke eng se se kokotelago godimo ga thaba kua?” “Ka baka la eng, ke mokgalabje wa leina la Noage, gomme o godimo kua, lehlanya la go tšofala. Mokgalabje o eme ka letšatšing botelele. O dikološwa ke letšatši. O tšwele monaganong wa gagwe. Gomme o aga se a se bitšago ‘areka,’ gomme o re meetse a ya go tla go tšwa godimo kua mo go sego meetse, gomme a ya go phaphamatša batho ka moka go dikologa; gomme yo mongwe le yo mongwe yo a sa kwego molaetša wa gagwe, le yo mongwe le yo mongwe yo a ka se kego a tla ka go areka yela, o ya go nwelela. A le kile la kwa selo se se bjalo?” E be e le kgogedi ya go se tlwaelege!

<sup>62</sup> Ke a eleletša ge batho ba be ba nyaka go hirimana ka disego, ba be ba eya godimo gomme ba ema pele ga mojako wa areka gomme ba sega. “Ka baka la eng, o boletše mengwaga ye lekgolo ya go feta gore e be e eya go na! Rakgolo o mpoeditše gore o go kwele godimo mo o bolela gore e be e eya go na, gomme o sa itia go dikologa godimo ga seripa se sa go tšofala sa kota godimo mo. O reng o sa tle kgauswi le bowena?”

<sup>63</sup> Eupša e be e le Modimo a lokela go tiišetša tshephišo le go phethagatša seporofeto se moporofeta wa Gagwe a se dirilego. Sa go se tlwaelege kudu! Modimo a phethagatša tshephišo ya

Gagwe go Noage, mola ba bangwe ba be ba sega. Modimo gape o be a lokela go dira histori go laetša ba bangwe, le go letšatši le, gore O boloka Lentšu la Gagwe! Go bonala e sa kgonagale, gomme e sa kwagale, O sa boloka Lentšu la Gagwe. O be a e dira mohlala, go tšwa go mokgalabje yola a bego a kokotela areka yela, go batho ba ka mo Amerika bošegong bjo le mo gohle lefaseng. Ga go kgathale gore saentshe e reng, seo ba se bolelago, *se, seo*, goba se *sengwe*, O sa boloka Lentšu la Gagwe. O be a dira histori.

<sup>64</sup> Kgogedi e be e le eng letšatši le lengwe; selo se se sego sa tlwaelega se diregile morago ka lešokeng, gomme e be e le sethokgwa se se bego se tuka. Gomme moporofeta yo a bego a tšhaba o be a eme tlase ka lešokeng. Ga se a ke a ekwa lentšu, ga se a ke a ekwa modumo, eupša a lebelela gomme a bona selo sa go se tlwaelege godimo ntlhoreng ya thaba. Modimo o be a leka go goga šedi ya gagwe. Go swana le ka fao go lego lehono!

<sup>65</sup> Modimo o be a lokela go phethagatša Lentšu la Gagwe, ka moporofeta wa Gagwe Abraham, “Peu ya gago e tla diilela nageng ye šele mengwaga ye makgolonne. Ke tla ba ntšhetša ntle ka seatla se se maatla.”

<sup>66</sup> Gomme O be a lokišetša monna mošomo, ge A be a lokiša areka go ba lefelo la polokego la ka moka bao ba bego ba tla dumela. Modimo o beile sethokgwa se gore se tuke, gomme modiši yo wa dinku, Moshe, a re, “Ke tla no retologela ka thoko go bona gore selo se sa go se tsebje se ra go reng.” Gomme ge A fihlišitše Moshe godimo go ya sethokgweng, A bolela le yena.

<sup>67</sup> Kgogedi e be e le eng morago ka holong ya Pilato, ge modiši yo wa dinku a lahlela lepara fase gomme le fetoga serpente? Modimo a phethagatša tshepišo ya Gagwe go Moshe. Kgogedi e be e le eng Lewatleng la go Hwa, ge dipere tša Farao ka moka di be di maketše, ge di bona phefo e etla fase go tšwa magodimong gomme e aroganya Lewatle le Lehubedu go tloga go la go ja go ya go la ngele; gomme sehlopha sa go šokiša sa makgoba, se se bego se sepela ka mošomong wa Modimo, se sepela go tshela godimo ga naga yeo e omilego? E be e le eng? Modimo a boloka Lentšu la Gagwe. Go hwa gwa tloga, batho ba go phela ba ya go tshela; gomme batho ba ba hwilego semoyeng ba ile ba leka go e ekiša, gomme ba nwelela. Modimo a phethagatša seporofeto gomme a dira histori. Yeo e be e le kgogedi Lewatleng la go Hwa.

<sup>68</sup> Kgogedi e be e le eng letšatši la bobedi ka morago ga seo, Thabeng ya Sinai, ge batho ka moka ba laelwa gore ba se ke ba tla go basadi ba bona, ge ba ile ba kgopelwa go hlatswa diaparo tša bona le go itlhwekiša ka bobona, le go kgobokana go dikologa thaba moo monna wa leina la Moshe a boletšego gore o kopane le Modimo ka Pilareng ya Mollo? Gomme Modimo o be a rile go Moshe, “Nna ke ya tla fase magareng

ga batho. Nna ke ya go tiišetša seo Ke go boditšego, le gore Ke nna Mang. Nna ke ya go ba laetša gore Ke nna Modimo.” Yeo e be e le kgogedi, Modimo a phethagatša Lentšu la Gagwe.

<sup>69</sup> Kgogedi e be e le eng letšatšing le lengwe ka historing, fao setšhaba se bego se lebetše Modimo, moo batho ba bego ba le ba go itlhopha le ba go se fapane, fao baprista ka moka ba bego ba ile le motlwae wa sebjalebja, baporofeta ba porofeta go ya ka thato ya baprista? Gomme ka letšatšing leo, bjalo ka mehleng, ba be ba na le monna yo motee yo ba bego ba gopola gore e be e le lehlanya. O be a bolela ka basadi ba ba tlotšego dipente, le se sengwe le se sengwe, gomme e be e le mohuta wa moisa wa go se kwišišege. Gomme mothaka yo wa go tšofala o tllile tlase gomme a re go kgoši, “Le ge e le phoka e ka se ye go bitša. . . go tla go fihla ke e bitša.”

<sup>70</sup> Gomme re a hwetša, nako yeo, gore o ile a ikuta ka seyena gomme a tšhaba go tloga go yona, gomme a ikuta ntle ka lešokeng felotsoko. Khamphane e ile ya gopola gore o bolailwe ke tlala go ya lehung goba go hwa; eupša o be a fepša gabotse, a fiwa le meetse, gape. Gomme šo o be a le mo, o tla fase gomme a re, “A le a bona gore ke na le GO RIALO MORENA? Bjale, ge le se la kgodišega le bjale, a re yeng godimo ntlhoreng ya thaba gomme re kgonthiše gore Modimo ke mang,” ka gore o be a na le pono ye nngwe gape go tšwa go Morena.

<sup>71</sup> A re, “Kgethang lena a—aletara, gomme le e dire, gomme—gomme le kgethe pholo gomme le di hlabe. Ke tla dira aletara ya Morena, gomme le nna ke tla bea pholo godimo ga ya ka. Rena mmogo re tla dira sehlabelo, gomme a nke Modimo yo e lego Modimo a arabe.” O be le ka mokgwa ofe a ka se dire seo ge Morena a be a se a mmotša; o boletše bjalo ka morago, “Ke dirile se ka. . . ka moka se, ka taelo ya Gago, Morena.”

<sup>72</sup> Eupša kgogedi ke eng? Go na le baprista ba makgolonne ba eme godimo ga thaba, le kgoši godimo kua ka koloing ya gagwe, le ka moka dihlabani tša gagwe le bašireletši ba gagwe ba eme go mo dikologa. Gomme yo wa go tšofala, wa sa boya, sa go lebelelega-mahlafarara-sefahlego monna, wa hlogo ya lefatla, le moriri o lepeletše fase godimo ga sefahlego sa gagwe, seripa sa mokgopha wa nku o rareditšwe go mo dikologa, le moriri mo gohle mmeleng wa gagwe, o be a eme godimo kua ka lepara ka seatleng sa gagwe, le sedibelo sa oli ka seatleng se sengwe; yo a ilego a no re, mengwaga ye meraro le seripa pele ga fao, “Le ge e le phoka e ka se we go fihla ke e bitša, e bitša,” a tšea legato la Modimo, le dilo ka moka ba boletšego ka mahlaledi le merithi, le ka moka ba boletšego ka tšona. “Gomme mo lehlanya lela la go tšofala le eme kua godimo ga thaba kua, gomme o tliša ka moka batho ba godimo kua.” Kgogedi yela e be e le eng? E be e le Modimo a lokišetša go hlatsela moporofeta wa Gagwe gore o a rereša. E be e le Modimo a phethagatša seporofeto. Modimo gape a dira histori, a phethagatša Lentšu.

<sup>73</sup> Makgolo a se makae a mengwaga ka morago ga fao, fao go be go le monna yo a tloiditšwego ka Moya wo o swanago, gomme o ile a tšwa ka lešokeng, a sa kgokagana le wo o itšego wa mekgatlo; le ge tatagwe e be e le monna wa mokgatlo, moprista wa tshephišo. Eupša o tšwa lešokeng, a apere mokgopha wa nku go mo dikologa, moriri ka moka sefahlegong sa gagwe. Go na le gore e be wo mopududu, e be e le wo moso. Kgogedi ya monna yo e be e le eng yeo ya go goga Jerusalema ka moka le Judea? Ba bangwe ba bona ba eya ka ntle gomme ba re, “Fao go na le monna wa lebelele tlase kua. O leka go nweletša batho ka meetseng. Ke mang yo a kilego a kwa selo se se bjalo ka seo?”

<sup>74</sup> Ba bangwe ba be ba fišegelwa, gomme ba re, “Yo e swanetše go ba e le Mesia.” Yo motee wa bona o rile, “E ka kgona go ba yo mongwe wa baporofeta.” Ba be ba sa tsebe gore ba ka nagana eng. Eupša e be e le eng? E be e le Modimo a phethagatša Jesaya 40, moo A rilego, “Bonang . . .” se A bego a tla se dira ka matšatšing a mafelelo, ka fao A bego a tla romela mohlanka wa Gagwe le seo a bego a tla se dira.

<sup>75</sup> Ka gona re a hwetša, dibeke di se kae ka morago ga fao, monna yola o be a na le kgonthe ka molaetša wa gagwe, go fihla a rile, “Fao go na le yo Motee yo a emego magareng ga lena, Yo ke se nago maswanedi a go rwala seeta sa gagwe. O tla le kolobetša ka Moya wo Mokgethwa le Mollo, bjalo ka ge ke le kolobeditše ka meetse.”

<sup>76</sup> Letšatši le lengwe monna wa mehleng, Monna yo moswa, a ka bago masometharo a mengwaga ka bokgale, a sepelela tlase gomme a kolobetšwa. Gomme ge Monna yo a etla, fao go be go le kgogedi ka moporofeta, moporofeta a dira ka mokgwa wa go se tlwaelege letšatši leo. Phuthego ga se ya thuša go tloga go bogeleng tiro ya moporofeta yoo.

<sup>77</sup> Ge a sa ngangišana le baprista ka mošwa noka, ba re, “Modimo o agile aletara ye. Modimo o re boditše go dira se. Moshe ke moporofeta. Re dumela Moshe. Sehlabelo se ka se ke sa be sa tlogelwa.”

<sup>78</sup> Ka kgona go kwa Johane a araba morago, a re, “A ga se la bala ka Lengwalong se Daniele moporofeta a seboletšego, ‘Sehlabelo sa ka mehla se tla tlogelwa?’ Gomme iri yeo e fihlile! A ga la bala se Jesaya a se boletšego ka go ya 40 tema, ‘Lentšu la yo a goeletšago ka lešokeng, lokišang tsela ya Morena?’ Fao go na le diporofeto tše pedi tša ka. Gomme selo se sengwe gape, a ga se la lemoga moporofeta wa rena mengwaga ye makgolonne ya go feta, Maleaki, ge a boletše ka go ya 3 tema gomme a re, ‘Bonang, Ke roma motseta wa Ka pele ga sefahlego sa Ka, go lokiša tsela?’ A ga le tsebe gore se se phethagatša seporofeto?” Seporofeto se be se phethagatšwa!

79 Gomme e ka ba ka yona nako yeo moporofeta a retologa gomme a re, “Bonang, fale go tla Kwana ya Modimo ye e tšeago go tloša sebe sa lefase!” Bjale kgogedi ke eng? Se fetoga go tloga go moporofeta go ya go seporofeto sa gagwe.

80 Bjale hlokomelang se se tlogo go phethagala. Fa go tla Monna wa mehleng, yo a sa tsebjege ke motho, morwa wa mmetli, o tla a sepela go tšwa ka meetseng. Ge Johane, moporofeta yo mogolo, a rile, “Ke nyaka go kolobetšwa ke Wena. Ka baka la eng Wena o etla go nna?”

81 O rile, “Lesa seo se be bjalo. Eupša, bjalo ka moporofeta le Lentšu, go a re swanela go phethagatša toko ka moka.”

82 Ka fao a kwišiša gore Sehlabelo se swanetše go hlatswiwa pele se neelwa, gomme a Mo kolobetša.

83 Bjale fao go na le kgogedi ye nngwe ye e diregago ge A etšwa ka meetseng. Moporofeta yo yo a bego a botegelela go bega lebaka la gagwe le nako, o ile a lebelela godimo gomme a bona magodimo a bulega. A bona Moya wa Modimo, bjalo ka leeba, o theogela godimo ga Gagwe, gomme Lentšu la re, “Yo ke Morwa moratwa wa Ka Yo ke kgahlwago Ke go ba ka go yena.” Modimo o be a hlatsela molaetša wa moporofeta, wo o bego o goga šedi ka Jorodane.

84 Ngwanešu o opetše lebaka la go feta, goba o be a swanetše go opela, “Godimo ga dithaba kgole go tloga go eme sefapano sa makgwakgwa.” Kgogedi ke eng Thabeng ya Khalibari? Ge re bona lefase la bodumedi le Mo ahlotše, gomme mmušo wa Roma o Mo ahloletše lehu. Gomme mo O be a lekeletše magareng ga disinyi tše pedi, a nyoretšwe sa go nwa, Madi a kitima go tšwa mmeleng wa Gagwe. Šole O lekeletše, o a lla, “Modimo wa Ka, Modimo wa Ka, O Ntlogeletše eng?” Gomme batho ba bodumedi ba be ba eme fale, ba e lebeletše, bonnyane ba be ba tseba gore seporofeto sa Tastamente ye Tala se be o gahlanetšwa Khalibari ka nako yeo.

85 Dafida ka boyena o ngwadile, o dirile...o wetše ka Moyeng bjalo ka baporofeta ka moka, o ile a dira mo o ka rego e be e le yena. Dafida o llile, ka go ya 22 Psalme, “Modimo wa Ka, Modimo wa Ka, O Ntlogeletše eng? Ka moka marapo a Ka a Ntebeletše. Ba thubutše diatla tša Ka le maoto a Ka.” Dafida, o be a bolela mo o ka rego e be e le yena. Gomme e be e se Dafida, e be e le Kriste ka go Dafida.

86 Gomme mo sona seporofeto se se tšwetšego ntle, sa baporofeta ka moka ba go fapana, se be se phethagatšwa godimo ga Thaba ya Khalibari. Kgogedi ke eng godimo ga Thaba ya Khalibari? Modimo a phethagatša Lentšu la Gagwe.

87 Kgogedi ye nngwe gape e be e le thabeng, e be e le ka Letšatši la Pentecost, ge ka moka ga bona ba be ba le godimo kua ka monyananyeng wa bodumedi, ba nagana gore ba be ba fedišitše

mahlanya ka moka. Ba be ba se ba ke ba ekwa go tšwa go bona lebaka la matšatši a lesome. Ka moka ka potlako, bjalo ka motšhitšhi wa dinosi, ba thibologa go tšwa ntlhoreng ya moago, ba tšwela ntle ka diterateng, ba goelela gomme ba tšwela pele.

<sup>88</sup> “Ke eng se? Se se ra go reng? A ka moka banna ba ba tagilwe?”

<sup>89</sup> Hlokomelang! Gomme moporofeta a emela godimo magareng ga bona, bjalo ka ge tshephedišo ya moporofeta e swanetše go ba, gomme a re, “Lena banna ba Israele, le lena ba le dulago Judea, ka Jerusalema, a nke se se tsebje go lena, gomme ekwang mantšu a ka. Ba ga se ba tagwe bjalo ka ge le nagana gore ba tagilwe. Eupša se ke se se boletšwego ke Morena ka Joele, moporofeta, ‘Go tla tla go phethega ka matšatšing a mafelelo, Ke tla tšhollela Moya wa Ka ntle godimo ga nama ka moka.’” Yeo e be e le kgogedi.

<sup>90</sup> Batho ba bodumedi, ka morago ga go bapola Kgoši ya Bophelo, le se sengwe le se sengwe, go le bjalo ga se ba ke ba bona tshephišo ya go tla ga Moya wo Mokgethwa. Kgogedi, “Ke mang yo? Se se ra go reng? Molato ke eng ka bona batho?”

<sup>91</sup> Oo, nna! Go a swana lehono. Re tla feta bontši bja se go e tliša go iri ye. Ke selo se se swanago lehono. Selo se se swanago se a direga. Potšišo ye e swanago e a botšišwa. “Ke eng lešata le ka moka?” Lebelelang godimo-le-fase seterateng, dikoloi go tšwa Michigan go ya Florida, go tšwa Maine go ya California. Mosong wo ge ke be ke otlella ntle, goba thwi ka morago ga sekgalela mo, re be re eya go theoga seterata, mosadi le nna re be re lebeletše dilaesentshe godimo ga dikoloi. Fao ke mo ka go gopola ka temathero ye.

“Se se ra go reng?”

<sup>92</sup> Go no swana le ge Le bolela, “Fao go lego Setoto, dintšhu di tla kgobokana moo.”

<sup>93</sup> Ka re go mosadi wa ka, “Hani, o gopola bošego bja go feta ge ke ile ka swanela go laelana le se sengwe le se sengwe seo se ratwago go nna lefaseng, gomme ka ya ka mašemong go thoma selo se sengwe seo Modimo a ilego a re ke se dire? Le opetše kopelo yela.”

Oo, ba tla etšwa Bohlabela le Bodikela,

Ba tšwa naga di kgole,

Go keteka le Kgoši ya rena, go ja wa moeng  
wa Gagwe;

Baeti ba ba šegofetše bjang!

Ba bogetše sefahlego sekgethwa sa Gagwe

Se benya ka lerato Kgethwa;

Bašegofatšwa batšeakarolo ba mogau wa  
Gagwe,

Wa mabjebhlokwa korong ya Gagwe ba tla  
phadima.



<sup>94</sup> Seo ke se kgogedi e lego sona. Peu ye e kgethetšwegopele ya Modimo ye e ka se dirego selo ge e se go Le latela, le ra go feta bophelo go rena. Tšea maphelo a rena, eupša ga o tšea Leo. Kgogedi ke eng? Modimo, bjalo ka mehleng, o phethagatša Lentšu la Gagwe. O phethagatša Lentšu la Sakaria gape, la moprofeta Sakaria.

<sup>95</sup> Fao ke badilego ya 9 temana nako ya go feta, ge Jesu a tsena tempeleng ya Gagwe, a nametše...goba a tsena Jerusalema, a nametše ye nnyane, ye tšhweu tonki, seporofeto se Sakaria a se boletšego se be se phethagatšwa. Se Se sona, “Hlalalang gagolo, O barwedi ba Tsione. Goelelang, O barwedi ba Jerusalema. Bonang, Kgoši e tla go lena; Ke moloki, gomme o na le phološo; o bonolo, o nametše godimo ga pokolo, pokolopholo pokolwana ya pokolo.” Seo ke se e bego e le kgogedi ka Jerusalema, mošate wa bodumedi.

<sup>96</sup> Bjale re bona tiragalo ya letšatši la mafelelo! A re nong go phetla matlakala a se makae, ka go Sakaria, gomme re bone gore o reng ka yona. Gomme a re e phetleng ka gona bakeng sa matšatši a mafelelo. A o e be e le lebaka la magareng; a re phetleng bjale go matšatši a mafelelo. Gomme re phetle ka kua go Sakaria, ya 14 tema, gomme re thome ka ya 4 temana. Gomme theetšang! Gomme re ya go bala go theoga karolo ya Lengwalo, e ka ba ditemana tše senyane, go tloga go 4 go fihla go 9. Theetšang sekgauswi. Gomme e porofeta ka go Tla ga Gagwe, matšatši a mafelelo. Theetšang sekgauswi bjale. Se ke O RIALO MORENA. Ke Mangwalo, Sakaria 14. Elelwang Sakaria 9, se E se boletšego? Gomme ga se ba ke ba Se lemoga. Bjale ke eng lehono? Sakaria 14, e bolela ka go Tla ga Gagwe.

*Gomme maoto a gagwe a tla ema godimo ga thaba ya Mehllware ka letšatšing leo, gape, yeo e lego pele ga Jerusalema ka bohlabela, godimo ga thaba ya Mehllware go tla phatloga ka bogare ga yona go ya bohlabela le go ya bodikela, gomme fao go tla ba moedi wo mogolo; . . .seripa sa thaba se tla šuthišetšwa go ya lebowa, gomme seripa . . .go ya borwa.*

*Gomme le tla tšhabela moeding wa dithaba; ka gore moedi wa dithaba o tla fihla go tloga Asal: ya, le tla tšhaba, go swana le ge le tšhabile ka matšatšing a tšhišinyego ya lefase ka matšatšing a Usia kgoši ya Juda: . . .*

<sup>97</sup> Mororomelo wo mongwe gape wa lefase o phatloganya go bula lefase! Ge le nyaka go latela Lengwalo ntle mo, elang hloko go ya 5 temana, e bolela gore go phatloga ga Thaba ya Mehllware ke ka baka la tšhišinyego ya lefase, gomme se se tiišetšwe ke Jesaya 29:6 le Kutollo 16:9. Tlwa! Ke eng? Moprofeta yo a swanago o boletše go tla ga Gagwe la pele,

o bone go Tla ga Gagwe la bobedi. Elang hloko, “Bjalo ka matšatšing a tšhišinyego ya lefase.” Le a bona se ditšhišinyego tša lefase di se dirago? Le bona polellopele ya yona?

*. . . gomme MORENA Modimo wa lena o tla tla, gomme ka moka bakgethwa ba gagwe le wena.*

*Gomme go tla tla go phethega ka letšatšing leo, (haleluya) ka letšatšing leo, gore seetša se ka se bonale gabotse, goba leswiswi:*

*Eupša e tla ba letšatši le letee le . . . letšatši le letee le le tlogo go tsebja ke MORENA, e sego mosegare, goba bošego: eupša go tla tla go phethega, gore go tla ba seetša ka nako ya mantšibuwa. (O Modimo!)*

<sup>98</sup> “Go tla ba Seetša nakong ya mantšibuwa,” moporofeta yo a swanago. Gomme batho ba foufetše! Kgogedi ke eng? A re baleng tše mmalwa gape ditemana.

*Gomme go tla ba gore ka letšatšing leo, meetse a a phelago a tla tla pele go tšwa Jerusalema; seripa sa wona go ya lewatleng la pele, gomme seripa . . . go ya lewatleng la morago: selemo le . . . marega go tla ba. (Ebangedi e ya pele; go mmogo Bajuda le Bantle.)*

*Gomme MORENA e tla ba kgoši godimo . . . a lefase: ka letšatši leo, gomme fao go tla ba MORENA yo motee, gomme leina la gagwe ke le letee.*

Go tla ba Seetša e ka ba nako ya mantšibuwa,  
(therešo)

Tsela ya go ya Letagong nnete o tla e bona;

Tseleng ya meetse go Seetša lehono,

O bolokilwe Leineng le bohlokwa la Jesu.

Baswa le batšofadi, sokologang dibeng tša  
lena ka moka,

Moya wo Mokgethwa nnete o tla tsena;

Seetša sa mantšibuwa se tlile,

Ke ntlha gore Modimo le Kriste ke Batee.

Le bona fao re lego?

Ditšhaba di a thubega, Israele e a tsoga,

Maswao a baporofeta ba rena ba a  
boleletšegopele; (mororomelo wola wa  
lefase go Bantle go letšatši la mafelelo)

Matšatši a Bantle a badilwe, ba šitišwa ke  
megoma;

Boang, O bašwallangwa, ga lena beng.

<sup>99</sup> Lena ba le raketšwego ntle, le diareka tše di rwelwego ka dikoloi tše mpsha, tšwelang ka ntle ga fao pele lehu le ratha. Modimo o Le tiišeditše. Go tla ba bjalo.

<sup>100</sup> A re phetleng ka go Lengwalo le lengwe ka Tastamenteng ye Tala, Maleaki ya 4 tema, gomme re bale ye nnyane yela ya 4 tema.

... *bonang, letšatši le a tla, le le tla fišago bjalo ka obene; gomme ka moka baikgogomoši, ya, ... ka moka ba ba dirago bobo, ba tla ba bjalo ka makobe: ...*

<sup>101</sup> Bjale, le ga se... Leo ke Maleaki 3, e be e le go tla la mathomo, bjale šifa go tla mo go latelago. Le Ngaka Scofield mo, ka nnete ga ke kwane le yena ka dinoutse tša gagwe tša ka fase, eupša o na le yona e le mothalong ntle mo ka go nepagala. "Thomo ya Johane," go Maleaki 3; le, "Go Tla la bobedi ga Kriste," le Eliya pele ga fao. Ka moka gabotse.

... *ka moka baikgogomoši ba tla swela godimo, go rialo MORENA wa mašaba, gomme le ka se ba šadiše modu le lekala.* (Hele ya "ka Gosafelego" e kae gona?)

*Eupša go lena ba le boifago leina la ka le tla hlabelwa ke Letšatši la toko la dikhampeine tša phodišo, phodišo ka diphegong tša lona; ... le tla ya pele, la golela godimo; bjalo ka mamane tša lešaka.*

*Gomme le tla gatakela ba babe fase; ... ba tla ba bjalo ka melora ka fase ga dikgato tša maoto a lena ka letšatši leo Ke tla dirago se, go rialo MORENA wa mašaba.*

*Elelwang... molao wa Moshe mohlanka wa ka, wo Ke o laetšego... yena Horebe e le wa Israele ka moka, ... le ditaelo le kahlolo.*

<sup>102</sup> Go tla ga Eliya šefa.

*Bonang, Ke tla romela Eliya moporofeta go lena ...*

<sup>103</sup> Lengwalo la mafelelo la go tswalela la Tastamente ye Tala!

... *Ke tla le romela Eliya moporofeta go lena pele ga go tla ga letšatši le legolo lela la go šiiša la MORENA:*

<sup>104</sup> Bjale, yoo e ka se be Johane. Aowa. Le a bona, lefase ga se lake la swa le baloki ga se ba ke ba sepela ntle godimo ga ba babe. Le a bona? Aowa, aowa.

... *pele ga letšatši le legolo le le šiišago la MORENA:*

*Gomme o tla bušetša dipelo tša botate go bana, le dipelo tša bana go botate, gore ke se ke ka tla gomme ka otlala lefase ka thogako.*

<sup>105</sup> Hlokomela go lebanya ga Moya wo Mokgethwa, gore Ga se wa gakantšha gona go tla mo gobedi ga Eliya. Maleaki 3, e rile, "Bonang, Ke roma motseta wa Ka pele ga sefahlego sa Ka." Jesu o ile a botšišwa ka Johane; A re, "Ge le ka kgona go e amogela, yo ke yo moporofeta a rilego, 'Ke tla roma motseta wa Ka pele ga sefahlego sa Ka.' Yo ke Elias yo a bego a swanetše go tla." Maleaki 3.

<sup>106</sup> Elang hloko Lengwalo ka go lebanya ka bothakga le a e fa. Hlokomelang seo se... go laetša... bona ba ba nyakago go dumela, bona ba ba nyakago go e bona. Elelwang, Jesu o eme ka bogareng bja Lengwalo, ka baka la gore karolo ya lona e be

e phethagadišwe nako yeo, ya go šala e le ya go Tla ga Gagwe la bobedi? “Go rera ngwaga wa go amogelega wa Morena, go tlemelela ba dipelo tše di robegilego,” gomme a ema; e sego “go tliša kahlolo go Bantle” go fihla go Tleng ga Gagwe la bobedi.

<sup>107</sup> Elang hloko Lengwalo le mo le bapela le seo. “Gomme yena, Eliya, o tla bušetša dipelo tša botate go bana.” (Bjale go bolela ka Maleaki 4, le se ke la e hlakanya, goba Maleaki 3.) Johane, Eliya, yo a tlilego matšatšing pele ga go tla la pele ga Kriste, go bušetša dipelo tša botate ba bapatriaka ba kgale go molaetša wa bana, molaetša wo moswa.

<sup>108</sup> Bjale hlokomelang. “Le dipelo tša bana go botate.” Ka mo go tleng ga gagwe la bobedi, ka matšatšing a mafelelo, o bušetša morago go Tumelo ya baapostola gape. Le bona ka fao Mangwalo a lego mothalong ka go phethagala?

<sup>109</sup> Yeo e be e le mafelelo a Tastamente ye Tala, Tastamente ye Tala. Bjale re a bona fao go Seetša nakong ya mantšibuwa. Ke eng Lona? Ke ntlhorana, Ntlhorana ya Mohlare wa Thabeng.

<sup>110</sup> Bjalo ka ge ke boletše mosong wo, re tlile godimo go kgabola dikereke tša maina, go kgabola (e sego mohlare wa monamune) bjalo ka ge ke boletše ka wona mosong wo, eupša re bile le papalamune, le swiri, re bile le tše dingwe tše di bego di sa swane le mathomong le gatee. Eupša ka morago. . . E se go lahlegele. Ke ye E etla. Morago ga ge ka moka dikereke tša maina di bapaletše ntle, di be di se na le Seetša la mathomo, fao go tla ba le letšatši le le ka se kgonego go bitšwa mosegare goba bošego.

<sup>111</sup> Di dira eng? Di dira eng? Na swi—swiri e dira eng godimo ga mohlare wa monamone? E tšea bophelo bja setlogo bja namone bjo bo tlogo godimo gomme ya bo fapoša ka swiri. Seo ke se dikereke tša maina di se dirilego go Lentšu la Modimo, di dirile Lentšu la Modimo la go hloka khuetšo ka ditšo tša tšona. Seo ke GO RIALO MOYA WA MORENA. Di tlišitše pele diswiri, dipapalemone, e sego dinamone.

<sup>112</sup> Eupša moporofeta o boletše eng? Yo motee yo a swanago yo a boletšego temathero ya rena bošegong bjo, “Hlalalang, O barwedi ba Jerusalema, goelang kudu, barwedi ba Tsione, ka gore Kgoši ya lena e tla go lena, e le ye boleta le bonolo, e dutše godimo ga pokolwana ya pokolo,” elang hloko yena moporofeta yo a swanago o rile, “Fao go tla tla nako ya go butšwa.” Letšatši le romelwa godimo ga lefase go buduša dienywa. Ka baka la eng e sa kgone go budušwa? Fao ga go kenywa ya go budušwa. Eupša Bophelo bo sa sepelela godimo.

<sup>113</sup> Bo tla godimo ka papalemone, go ba namune, bo hwetšwa gore bo kgatlofaditšwe; e be e le papalemone. E ile gape, ya tla ntle nako yeo e le swiri. Ya ya godimo gape, ya fetoga go ba selo se sengwe gape. Gomme mafelelong, ntlhoreng ya mohlare, e fetoga go ba tangelo, yeo e lego seripa sa namune,

seripa sa swiri; setšweletšwa sa motswako, selo sa go fapošwa; se tla godimo go phapošo, se phela go tloga mohlareng wo o swanago; mooko, “gabotse o ka fora Bakgethiwa.” E lebelelega bjalo ka namune, eupša ga se yona.

<sup>114</sup> “Eupša go tla ba Seetša,” ge e gola bokagodimo ga mokgatlo. Ge e etla ntle go feta mokgatlo, o hlogela ntle gape, e tla enywa dinamune go swana le ka fao o bego o le ka gona ge o eya ka mobung, gomme ka gona go tla ba Seetša.

<sup>115</sup> Kgogedi ye ke eng; tiragalo ye ke eng? Go phethagatša Lentšu la Modimo. Fao go dihlatse tše pedi tša Tastamente ye Tala, gore se se tla direga.

<sup>116</sup> A re buleng Johane 14:12, ya Tastamente ye Mpsha, Jesu o rile.

*. . . Yo a dumelago go nna, mediro ye Ke e dirago o tla e dira le yena; . . .*

<sup>117</sup> Gape, ka go Luka 17:22 go ya go 30, O rile.

Bjalo ka ge go bile bjalo ka matšatšing a Loto, pele Sodoma, e tšhungwe, ka fao go tla ba bjalo maboweng a Morwa wa motho, *letšatši* leo ge *Morwa wa motho a utollwa*.

<sup>118</sup> Oo, e nong go lebelela Mangwalo! “Morwa wa motho,” Jesu Kriste wa go swana maabane, lehono, le ka gosafelego, e godile go feta dikereke tša maina, o goletše ka ntlhoreng ya Mohlare. O rileng ka go Johane 14, goba 15? “Lekala lefe le lefe le le lego ka go Nna, le le sa enywego kenywa, le tla ripša gomme la thenelwa, la lahlalwa ka mollong gomme la tšhungwa. Eupša lekala le lengwe le le lengwe le le enywago kenywa, le tla hlwekišwa.”

<sup>119</sup> Oo, fao go tla ba le pula ya pele ya therešo le pula ya morago ka matšatšing a mafelelo godimo ga sehlopha se sennyane se se tlogo le Yena godimo ga tonki ye nnyane ye, se bonolo sa go kokobela, ga go to- . . . goba kereke ya leina, ye e goelago, “Hosiana go Kgoši ye e tlogo Leineng la Morena!” Molato ke eng lehono? Kgogedi ke eng thabeng?

<sup>120</sup> E sego telele go fetile, ke be ke eme phuluphiting ye, e boletšwe ke Moya wo Mokgethwa, “Letšatši le tla tla leo ba tlogo go itielela kota fase pele ga ntlo ya gago; ba tla šuthiša sefero sa gago. Ka fao, gore, o tla se feta, o se wa befelwa.” Ke bone sefero sa ka se robja gomme se robetše ntle godimo thoko ga thaba. Ke bone thaba pele ga ka, ka moka e epilwe, mapokisi le dilo di robetše fao moo selo se sengwe se bego se šilagantšwe. O rile . . .

Ka lebelela, gomme fao go be go le Ricky yo monnyane yo a ilego kua gomme a thulela sefero ntle, ba dirile se. Ka re, “Ka baka la eng o sa mpotša?” O ile a ba yo mokaone le nna, gomme ka swanelwa ke go mo itia. Gomme ge e dirile, ka re, “Ga se ka

ke ka dira se go tloga mola ke be ke le mosakong, eupša ke no nyaka gore o tsebe,” gomme ka mo lahlela ye tee. Gomme ge ke mo roletše fase, ka mo topela godimo gape gomme ka mo rotlela fase gape. Ka mo topela godimo, makga a mararo goba a mane, ka gona ka mo ragela ka kua ga thaba. Ka fao ka gona ka ya godimo kua, gomme ka re, “Seo ga se gabotse.” Gomme ka mo topela godimo gomme ka šišinya diatla tša gagwe, ka re, “Ga se ka go kwatela, eupša ke no nyaka gore o tsebe gore o ka se kgone go bolela le nna ka mkgwa woo.”

Gomme ka gona ge ke retologa gomme ke etla morago, Moya wo Mokgethwa o be o eme mola seferong, wa re, “Bjale feta se. Ge kota yela e kokotetšwe fase, retologela thoko ya bodikela.”

Puku ye, selo se sengwe le se sengwe ke se  
nyakago,  
Puku ye ke Motswako wo mobotse,  
Tsela ye e laetšago go dikologa bothata bja  
ka. Amene!

<sup>121</sup> Gomme Puku yeo ke Lentšu, gomme Lentšu leo ke Modimo. Feta mathata a gago, Le tla go botša gore o dire eng.

<sup>122</sup> Mengwaga ye meraro ya go feta ke kwele mogwera wa ka, mapotiele wa toropokgolo, o dula go theoga mokgotha go tloga go nna, a kokotela kota fase. Ke ile ka ya ntle kua gomme ka re, “Molato ke eng, Mud?” Morwa wa Mna. King, mogwera wa sebele.

A re, “Billy, ba ya go ngangološa tsela ye.”

<sup>123</sup> Ka moka le a elelwa. Ka re, “E ka no ba leporogo.” Ke boditše Ngwanešu Wood, ka re, “Swara phahlo ya gago. Mohlomongwe leporogo leo le ya go tla go kgabola godimo mo, selo se sengwe.” Mokgoba o ile wa phušulwa; ditena, matlapa, a lahleletšwe ka moka godimo ga se sengwe le se sengwe. Ka fao a re. . . Ka re, “Swara phahlo ya gago.” Ka gona ge ke. . .

Mna. King o mpoditše gore se se be se eya go direga.

<sup>124</sup> Ke ile ka ya ka gare, ka re go mosadi wa ka yo a dutšego fale, “Hani, fao go na le selo se sengwe se ngwadilwego ka seo. Ke GO RIALO MORENA, felotsoko.”

<sup>125</sup> Ke ile ka ya ka gare gomme ka tšea puku ya ka, ka lebelela ka go yona, gomme ya re, “Go tla tla go phethega. . .” Mengwaga ye seswai ka morago!

<sup>126</sup> Ka gona ge ke e lebelela, ka re, “Ke nako bjale, hani, re swanetše go retologela bodikela.”

<sup>127</sup> Matšatši a mabedi ka morago ga fao, ke be ke eme ka kamoreng e ka ba ka iri ya lesome mosong wo mongwe, ka ya ka Moyeng wa Modimo. Ka bona sehlophana sela se sennyane sa maeba se fofa, ka di lebelela tšona dinonyana tše nnyane. Le a e elelwa. Ke bone Barongwa ba šupa ka sebopego sa phiramite, ba etla ba kitimela go nna. Ba re,

“Retologela thoko ya bodikela, eya Tucson, eba dimaele tše masommenne lebowabohlabela. Gomme o tla be o topa mogomarelakgapana,” goba hlogo ya poo, ba o bitša seo kua, “go tloga diaparong tša gago.”

128 Ngwanešu Fred Sothmann, yo a dutšego mo a ntebeletšego thwi bjale, o be a le fao mosong woo. Ke be ke lebetše ka yona.

129 Ka re, “Mothuthupo o thuntše bjalo ka tšhišinyego ya lefase, wo wa go šišinya gabotse selo se sengwe le se sengwe seo se bego se le gona ka nageng. Ga ke bone gore motho o be a ka o phonyokga bjang.” Ke be ke tšhogile. Ka ema ka Phoenix, lena ka moka le theeditšego ka gare bošego bjo mpeeleng bohlatse. Ke rerile ka thero, *Bahlomphegi, Ke Nako Mang?* “Re mo kae?” Ke ile ka leba bodikela. Ba bantši ba lena mo le na le theipi yeo, ba bantši ba lena mo le kwele e boletše, ngwaga goba go feta pele e direga.

130 Ke ile ka ya bodikela, ke makala gore go be go eya go direga eng. Letšatši le lengwe ke hweditše pitšo ya go tšwa go Morena. Ka botša mosadi wa ka, ka re, “Hani, ke... go molaleng gore mošomo wa ka o fedile.” Ke be ke sa tsebe. Ka re, “ke... Modimo, Modimo o feditše ka nna bjale ke tla be ke eya Gae. Eya o e hwetše le Billy, tšea bana. Modimo o tla go direla tsela, ka mokgwa wo mongwe. Eya pele gomme o phele go rereša go Modimo. Bona gore bana ba tšwelela ka sekolo, ba godišetše go hlompheng Modimo.”

A re, “Bill, ga o—ga o tsebe gore seo ke therešo.”

Ka re, “Aowa. Eupša monna o be a ka se ke a phonyokga seo.”

131 Mosong wo mongwe Morena a ntsošetša godimo, a re, “Eya godimo kua ka Sabino Canyon.” Ke ile ka tšea seripa sa pampiri le Beibele ya ka.

Mohumagadi a re, “O ya kae?”

Ka re, “Ga ke tsebe. Ke tla go botša ge ke bowa morago.”

132 Ka ya godimo ka molapong, ka namela godimo fao dintšhu di bego di fofa go dikologa. Ke be ke bogetše tshephe ye nngwe e eme fao. Ka khunama fase go rapela, gomme ka emišetša diatla tša ka godimo, gomme Tšhoša ya ratha seatla sa ka. Ka lebelela go dikologa. Ka gopola, “Ke eng yeo? Ga ke kgauswi le nna mong. Tšhoša yela še ka seatleng sa ka; ya go etša, ya go phadima, ya go benya ka letšatšing.” Ka re, “Bjale, fao ga go batho dimaeleng go tloga go nna, tsela godimo mo ka mo molapong wo. A yeo e ka kgona go tšwa kae?”

Ka kwa Lentšu, le re, “Yeo ke Tšhoša ya Kgoši.”

Ka re, “Kgoši ya di knight monna ka tšhoša.”

133 Yena, Lentšu, a tla morago, a re, “E sego tšhoša ya kgoši, eupša, ‘Tšhoša ya Kgoši,’ Lentšu la Morena.” A re, “Se boife. Ke feela Kgogedi ya Boraro. Ke go hlatselela bodiredi bja gago.”

<sup>134</sup> Ke be ke eya go tsoma le mogwera, ke sa tsebe se se bego se eya go direga.

Gomme yo mongwe a mpitša, yo mongwe yo a go ntshwaswalatša ka senepe sela sa Morongwa wa Morena, yo motee yo a se tšerego. Ke ile ka swanela go ya Houston ka morwa wa gagwe, ka gore o be a eya mothalong wa lehu gomme o be a eya go bolawa matšatšing a se makae. Gomme o ile a kopana le nna ka kua gomme a lahlela matsogo a gagwe go ntikologa, a re, “Nagana, yena monna yo ka go mo swaswalatša o tla go phološa morwa wa ka yo motee!” Humane sosaeti e mpha se ba se bitšago oscar, goba eng kapa eng o nyakago go se bitša, bakeng sa go phološa bophelo.

<sup>135</sup> Ka gona ra boela morago, ka ya godimo ka thabeng go ya go tsoma. Fao, Ngwanešu Fred le nna, mosong wo mongwe ge ke sepelela ka ntle, gomme ke—ke be ke šetše ke swere jabeline ya ka, gomme ka lebelela gomme ka bona lefelo leo di ilego go lona. Ka re, “Ngwanešu Fred, eya bokagodimo godimo ga thaba yela ka leselaphuthiana ka mosong bjale, e ka ba ge letšatši le hlaba, gomme ke tla ya ka lehlakoreng le lengwe le letee. Nka se ke ka thunya kolobe, nka se e bolaye. Eupša ge di thoma bokagodimo ka tsela ye, mohlape wola, ke tla thunya ka pele ga tšona ka gona ke di kitimišetše morago.”

<sup>136</sup> Ngwanešu Fred a ya ka ntle kua gomme fao go be go se na le dikolobe. O ile a nkemišetša letsogo gomme ka bona. Ka ya tlase ka molapong, magaga a magolo, letšatši le be le sa tšwa go tla godimo. Ka tla go dikologa lehlakore le lengwe la thaba, ke sa gopole selo ka diporofeto. Ke dula fase, ke letetše, ke khutša; ka gopola, “Go diregile eng ka dikolobe tšela?”

<sup>137</sup> Ka topa ya ka. . . Ka dula fase go swana le ka fao Maindia ba dirago, le a tseba, go fapanya maoto. Ka lebelela godimo ga leoto la oborolo ya ka, gomme fao go be go le hlogopoo. Ka e topa. Gomme ka re, “Seo ga se sa tlwaelega! Ke nna yo, e ka ba dimaele tše masomenne lebowa bohlabela bja Tucson. Fao go na le mošemane wa ka yo monnyane Josefa o dutše fao o ntetetše.” Gomme ge ke thoma go lebelela, ka bona mohlape wa dikolobe o etla ntle e ka ba dijarata tše sekete go tloga go nna, godimo ga thaba, ka lahlela hlogopoo fase. Ka re, “Ke tla di hwetša. Ke tla ya ka hwetša Ngwanešu Fred, gomme ke tla lekeletša seripa sa pampiri godimo go tsebiša gore go ya ka tsela efe, godimo ga thabana ye mo, gomme re tla hwetša Ngwanešu Fred.”

<sup>138</sup> Gomme ka thoma go namela thaba, ke kitima ka maatla ka fao ke bego ke kgona ka lehlakoreng le lengwe. Ka moka ka bjako, ka gopola gore yo mongwe o nthuntše. Ga se ka ke ka kwa mothuthupo wo mobjalo; o ile wa šišinya naga yohle. Gomme, ge o dirile, pele ga ka go be go eme Barongwa ba šupa ka sehlopha.



139 Ke ile ka kopana le Ngwanešu Fred le bona, gannyane ka morago. A re, “E be e le eng?”

Ka re, “E be e le yona.”

“A o ya go dira eng?”

140 “Boela gae. Ka re, GO RIALO MORENA, diphiri tše šupa tše di bego di utilwe ka Beibeleng mengwaga ye ka moka, dikereke tše tša maina le se sengwe le se sengwe, Modimo o ya go bula diphiri tše šupa go rena ka go Mahuto a Šupa.”

141 Fao go be go le ntikudiku yeo godimo go tšwa lefaseng, bjalo ka mogudi o thomega. Ge E dirile, E ile thwi godimo ka thabeng, ya thoma go sepela ka go dikologa go ya thoko ya bodikela, go tšwa ka tsela ye E tlilego ka yona. Saentshe e E hweditše ka morago ga lebaka, dimaele tše masometharo godimo le dimaele tše masomepedi-tlhano go putlaganya, feela tlwa ka ntikudiku ya phiramite.

142 Gomme letšatši le lengwe, ke eme fao, ka retolla senepe go ya go la go ja, gomme fao go be go le Jesu bjalo ka ge A be a le ka go Mabaka a Šupa a Kereke, a rwele wiki ye tšhweu, go laetša Bomodimo bja Godimodimo. Ke Alefa le Omega; Ke Mathomo le Mafelelo; Ke Moahlodi Mogolo wa Bokagosafelego ka moka, o eme fale go tiišetša Molaetša wa iri ye. Gomme fao go tla ba Seetša ka nako ya mantšibuwa! Ke sa eng ka moka? E be e le eng?

143 Ke ile ka ya thoko ya bodikela. Godimo ga thaba ye e swanago, ke fete godimo le Banks Wood fao, ka re, “Ka lahlela letlapa godimo. Ka re go Mna. Wood, ‘GO RIALO MORENA, o tla bona Letago la Morena.’”

144 Lona letšatši le le latelago, ke be ke eme fao, sesaesedi se ile sa tla fase gomme sa thuthupiša dithaba ntle. Matlapa a ripa ntlhorana tša mehlare go tloga, e ka ba dikgato tše tharo goba tše nne bokagodimo ga hlogo ya ka. Ya dira methuthupo ye meraro ye megolo, gomme banešu ba tla godimo ba kitima. Fao go be go le banna ba e ka bago ba lesometlhano ba eme fao, bareri le selo se sengwe le se sengwe gape. “E be e le eng?” A re, “E be e le eng?”

Ka re, “Kahlolo e ratha Lebopo la Bodikela.”

145 Matšatši a e ka bago a mabedi ka morago ga fao, tšhišinyego ya lefase gabotse e nweletša Alaska. Seetša se ke eng godimo ga Thaba ya Sunset ka Sethokgweng sa Coronado sa Arizona? Ke eng selo se se sa tsebje go se se diregilego godimo kua, seo batho ba otlelago bohlabela go tšwa bodikela, ba topa matlapa ao a robetšego go dikologa fao Le rathilego? Gomme le lengwe le le lengwe la wona, letlapa le le lengwe le letee, le na le dikhona tše tharo godimo ga lona, le Le le thubilego. (Ba bararo ke yo Motee.) A robetše godimo ga diteseke, godimo ga maima a pampiri, go kgabaganya setšhaba. Ke eng selo se sa go se tsebje godimo ga Thaba ya Sunset ka Sethokgweng sa Coronado?

146 Junior Jackson o theeditše ka gare, le lelelwa toro ye a go ba le yona ye ka go e hlatholla, “go ya go leba bodikelatšatši”? Gomme se se diregile Thabeng ya “Sunset.” Ke nako ya mantšibuwa, nako ya go dikela ga letšatši. Molaetša wa go dikela ga letšatši ka go histori, go dikela ga seporofeto, ke ra gore, se phethagatšwa. Gomme go tla ba Seetša ka nako ya mantšibuwa, godimo ga Thaba ya Sunset ka Sethokgweng sa Coronado, dimaele tše masomenne lebowa la Tucson. Hwetša mmepe gomme o bone ge eba Ntlhora ya Sunset e gona. Fao ke tlwa mo o dirilego. Ga se ka ke ka e tseba go fihla letšatši le lengwe.

147 Se sengwe le se sengwe seo. . . Seo se ka se tsogego sa hwa. Se itatolla kgafetšakgafetša ka Bosona. Go tloga sona selo se direga, go ya go senepe e lego Jesu a eme a re lebeletše; gomme bjale tlwa godimo ga Thaba ya Sunset, Seetša sa go dikela ga letšatši. Seetša sa mantšibuwa se tlile, Modimo o itlhatsela ka Boyena. Ke eng? Ke dintlha gore Modimo le Kriste ke batee. Ye “tšhweu,” ke ba bakae ba e bonego, wiki ye tšhweu godimo ga Gagwe, bjalo ka ge re boletše ka go Kutollo 1? Le a bona, Bomodimo bja Godimodimo, Maatlataolo a Godimodimo; ga go lentšu le lengwe, ga go modimo yo mongwe, ga go selo se sengwe! “Ka go Yena go dula botlalo bja Bomodimo ka lebopo la mmele.” Barongwa ka Bobona e bile wiki ya Gagwe. Amene.

148 Go diregile eng godimo ga Thaba ya Sunset? Modimo o hlatsetše Lentšu la Gagwe. Ke ka moka le lešata le le lego ka sona. Elang hloko, ke Modimo o phethagatša Lentšu la Gagwe le le tshephišitšwego gape, la Kutollo 10:1 go fihla go 7, “Gomme ka matšatšing a go kwagala ga Molaetša wa morongwa wa bošupa, sephiri sa Modimo se tla be se phethagetše.” Sephiri se se fihlilwego sa Kutollo 10:1 go ya go 7, Molaetša wa mafelelo wa lebaka la kereke la mafelelo. Go phethagatša tlwa, ka lebakeng le, Mokgethwa Luka 17:30, “Letšatši le ge Morwa wa motho a tla utollwa.”

149 “Gomme fao go tla tsoga baporofeta ba maaka le Bokriste ba maaka, ba laetša maswao a magolo le dimaka, go fihla e tla fora le Bakgethiwa ge go kgonega.” Batho ba sa kamaka. Gomme, bjalo ka mehla, kereke e no ba bjalo ka kgakanego.

150 Gomme saentshe, ka moka go kgabola Tucson le bjale, ba ngwala diripana ba di bea ka pampiring. Tsela morago kua godimo ga Thaba ya Lemmon, tšona dikhamera tše kgolo ga se tša Le bona ge le tsogela godimo go tloga moo re bego re eme; le tlhetlhela pele go ya Bodikela, le laetša gore nako e fedile. Le ka se kgone go ya eupša seripana se sennyane fao; ke ka Lebopong la Bodikela. Kahlolo e rathile feela ka go yona tsela ye le ilego. Le ile thwi godimo bokagodimo ga Phoenix gomme thwi godimo go kgabaganya, go ya pele Prescott le go kgabaganya dithaba go ya Lebopong la Bodikela, thwi godimo go ya ka go. . . E ba be e eya kae? Thwi godimo go ya ka Alaska, gomme e a duma, e lebile thwi ka tsela yeo.

<sup>151</sup> Gomme mabogadinaledi le ka moka ga bona ka Tucson ba sa botšiša, dinyakišišo tša saentshe di leka go hwetša ntle gore ke eng. Godimo kudu ba ka se be kgudi, mouwane, goba ga go selo godimo kua. “Ke eng se se le dirilego? Le kae?” Ba sa makaditšwe ke Ntikudiku yela ya kagodimo ga tlhago e lekeletšego ka kua ka lefaufaung bjalo ka ge ba be ba le bjalo ka ge Baithutadinaledi ba tlile ka gare ba latela Naledi, ba re, “O kae Yo a tswetšwego Kgoši ya Bajuda?” E be e le eng? Modimo a phethagatša Lentšu la Gagwe, “Gomme fao go tla tsoga ntle naledi ya Jakobo.”

<sup>152</sup> Gomme Modimo wa Legodimo o tshephišitše gore nako ya mantšibuwa e tla ba le Dietša tša mantšibuwa. Mengwaga ye meraro ya go feta sephiri se e be e le seporofeto, “Ke nako mang, Mohlomphegi?” Eupša bjale ke histori. Se fetile. Tshephišo e phethagaditšwe. Ke nako mang, mohlomphegi, gomme kgogedi ye ke eng? Modimo o phethagatša Lentšu la Gagwe! O a swana maabane, lehono, le ka gosafelego.

A re rapeleng.

<sup>153</sup> Morategi Modimo, ka swareletše batho botelele, botelele kudu go feta ka fao ke bego ke ikemišeditše. Ke a rapela, Modimo, gore selo se sengwe se boletšwe goba se dirilwe se se tlogo go dira batho ka ntle goba kae kapa kae gore ba kwišiše. Gomme ka go bona le go kwišiša ba tla dumela gore Wena o Kriste wa therešo, gomme Mantšu a a tiišitšwego ke tiišetšo ya Lentšu la Gagwe go ba le le phethagetšego le go phethagatšwa ka lebaka la Lona.

<sup>154</sup> Bjale, Morena Jesu, go tšwa go Mantšu a Gago Mong, O boletše gore lefase le tla ba ka seemong sa Sodoma. Re tseba seo, re kgona go lebelela ka go sona. Gomme O rile, ka letšatšing leo, “Bjalo ka ge go bile ka Sodoma.” Fao go bile batseta ba bararo ba ba rometšwego go lefase la Bantle le Baheberu. Gomme yo motee wa bona, yo e bego e le Modimo ka Boyena, Morwa wa motho, o ikutolotše ka Boyena ka sebopego sa motho gomme a dira mohloho, bontši go fihla a botša Abraham se Sarah a bego a se dira ka morago ga Gagwe ka tenteng.

<sup>155</sup> O rile se tla boeletša gape ge lefase lohle la Bantle le tla ba ka seemong sa Sodoma. Gomme re mo, Morena. Diporofeto tše dingwe di tiišetša selo se se swanago, sa go romela Eliya ka matsatšing a mafelelo, Moya wa Eliya godimo ga lefase, go tliša dipelo tša botate, goba, “bana morago go botate.” Gomme ke a rapela, Modimo, gore iri ye yeo O tla tiišetšago Lentšu la Gago, gore O swana maabane, lehono, le ka gosafelego. E fe, Tate. Ka moka ke ba Gago. Ke a rapela gore O tla fa ditšhegofatšo tše le go tiišetša se se boletšwego, bakeng sa Letago la Modimo. Leineng la Jesu Kriste. Amene.

<sup>156</sup> Go bolela lentšu, ke motho; go tiišetša lentšu, ke Modimo. Go bolela selo se sengwe, ke selo se tee; Modimo go se dira, ke selo se sengwe gape. Modimo ga a nyake mohlatholli yo a itšego; O dira tlhathollo ya Gagwe Mong.

157 Bjale re lokišetša go ba le llaene ya thapelo, go rapella balwetši, Modimo ge a rata. Gomme re a tseba gore fao ga go le yo motee, ga go monna, ga go mosadi, ga go motho, ga go morongwa, yo a ka kgonago go go fodiša, ka gore Modimo o šetše a e dirile. O dirile ditokišetšo, selo se nnoši o swanetše go se dira ke go e amogela.

158 Fao ga go monna, ga go morongwa, ga go selo, le Modimo ka Boyena, a ka kgonago go go lebalela dibe tša gago. E šetše e dirilwe. Jesu o dirile seo Sefapanong. Eupša e ka se go hole, goba eng kapa eng, goba ya go hola ka eng kapa eng, go fihla o e amogela. Le a bona?

159 Selo se nnoši se kgonago go dirwa, ke ditaelo tše di filwego ke Modimo, go badumedi go bea diatla godimo ga balwetši. Go bile bjalo go kgabola mabaka ba dirile seo, ka ditsošetšo. Gomme ba e biditše, “Modimo.”

160 Abraham o bone maswao a mantši. Eupša fao gwa tla nako mo Abraham a go bona leswao la gagwe la mafelelo, feela pele Sodoma e tšhungwa, gomme yoo e be e le Modimo a iponagatša ka Boyena ka sebopego sa monna. A le dumela seo? A Jesu o rile se tla boeletša?

161 Bjale, ke ba ba kae ka mo. . . Le ka ntle ka seyalemoyeng, goba ka ntle ka megaleng go kgabaganya setšhaba, ge le sa theeditše ka gare, lokelang thapelo bjale, re tla be re rapela, le lena bao le nago le disakatuku mo. Bjale, nka se kgone go botša Modimo gore a dire eng. Aowa, a go be kgole le nna le go no e leka. O ikeme; O dira se A nyakago go se dira. Ke kgona feela go obamela le go kgona go bolela feela se A se bolelago.

162 Gomme bjale ba eme go dikologa maboto, ba pitlagane ka gare, ke semenyamenya. Ke a makala ge re ka kgona go kgopela Modimo godimo ga mantšu a, “Kgogedi ye ke eng?” Ge Modimo a ka sepela ka magareng ga rena gape (go ka no ba le basetsebeje mo), gomme a sepelela ka magareng ga rena gomme a laetša sefahlego se se šegofaditšwego sa Gagwe ka magareng ga rena, a laetša Moya wa Gagwe mo, a laetša gore O a swana maabane, lehono, le ka gosafelego, gore yo mongwe le yo mongwe wa rena (ka morago ga Melaetša ye mebedi ye ya maatla) a ka kgona go e dumela gore go be bjalo? A le ka kgona go e dira? Ka moka gabotse.

163 Go na le go bitša llaene ya thapelo, ka gona; go a fiša, ke semenyamenya, le eme go ithekga lebotong. Ke lebelela go dikologa ka tsela *ye*, go bitša llaene ya ka ya thapelo, o ka se kgone go e dira; lebelelang, ba eme fale. A nka kgona go e bitša ka tsela *ye*? Balwetši ba lena, dikoloyana, se sengwe le se sengwe gape, se robotše; o ka se kgone go e dira. Ka fao dula moo o lego, gomme o dumele Modimo. Ge o na le karata ya thapelo, e sware, e tla ba mo go botse. Re tla tla go wena ge o nyaka go tla go kgabola llaene. Eupša ga o a swanela go tla go kgabola llaene.

164 Yola Mna. Shepherd, Lamorena la go feta bošego, ga se a ke a tla go llaene. Ga ke—ga ke thanke gore o be a na le karata ya thapelo. A Mna. Shepherd o gona bošegong bjo? Naa o kae? A o gona mo? O ka morago. A o be o na le karata ya thapelo, Mna. Shepherd? O be o se nayo? O be a se nayo. O dutše thwi fao gape, bošegong bjo. Ke lefelo le lebotse go ba go lona, Ngwanešu Shepherd.

165 E sego feela gore o swanetše go ba fao, eupša e no ba le tumelo. Ka gore, elelwang, mosadi yo monnyane o ile a kgwatha seaparo sa Gagwe gomme A e kwa. Gomme O a swana maabane, lehono, le ka gosafelego. Gomme lengwalo la Baheberu, ka Tastamenteng ye Mpsa, le rile Ke Moprista yo Mogolo bošegong bjo yo a ka kgonago go “kgwathwa ke dikwi tša mafokodi a rena.” A le dumela seo? Gona ebang le tumelo! Le seke la Le kamaka. Le dumeleng, gomme le tla kgona go phethega. Le ka kgona go ba le—le seo le se kgopelago, ge le ka kgona go Le dumela. Eupša ge le eya go Le dumela. A le ka e dira? A ka moka ga lena le ka Le dumela? Ke ba bakae ba ba ka Le dumelago bjale? Modimo a le šegofatše.

166 Ga ke tsebe gore mang ke mang. Ga ke tsebe le yo motee wa lena. Ga se taba ya ka go tseba yo mongwe wa lena. Ke taba ya Modimo go tseba dilo tše. Eupša O tla e dira ge le ka Le dumela. A le ka Le dumela bjale?

167 Bjale, Morategi Modimo, ka nnete ga se rena sehlopha sa motswako wa Bakriste, ga ra swanela go ba, yo mongwe yo a swanetšego go pepetletšwa le go dirwa lese. Ga o na le mohuta woo, Morena. O na le badumedi ba makgwakgwa. Bjona Bogona bja Modimo bo bea pelo ya monna e tuka. Bjalo ka Abraham, o ile a dumela Modimo. O ile wa itira ka Bowena go tsebja ke yena, ka gona O bonagetše go yena gomme wa dira leswao, gomme a Go dumela. O bušeditše mmele wa gagwe morago go monna yo moswa, gomme gape le mosadi wa gagwe, yoo, mosadi wa gagwe e be e le karolo ya mmele wa gagwe mong. Ka gona gwa tla pele ngwana yo moswa, morwa wa tshephišo.

168 Modimo, O tshephišitše gore e tla ba selo se se swanago ka letšatšing le. Ke a rapela gore O tla tiišetša Lentšu le. Gomme re tla šoma thwi godimo ga tshephišo ye tee fao, gore go tla swana le ka fao go bego go le ka Sodoma, feela pele Sodoma e tšhungwa gomme kahlolo e ratha Sodoma, lefase la Bantle. Ka fao kahlolo e lokišetša go ratha lefase la Bantle, gomme Bajuda ba na le mengwaga ye meraro le seripa gape go kgabola nako ya Tlaišego, bothata bja Jakobo, tšwetšopele ya dibeke tše masomešupa tša Daniele. Eupša, a Bantle a ba badilwe, ke nako ya go tloga. Gomme O fa leswao leo, gomme O boletše gore e tla ba gape. E fe, Modimo. Ba, re ka diatleng tša Gago, dira ka rena ka mo O bonago go swanetše. Leineng la Jesu Kriste. Amene.

169 Bjale le se ke la ba le poifo. Go be go tla ba eng ge nkabe ke be ke boifa? Bjale, ke dira selo mo seo se swanetšego go ithekga ka boikemo bja Modimo. Eupša ke ka baka la eng ke dira se? O rile se tla ba. Seo se a e rarolla. Gomme ge A itira seo ka Seyena, se tiišetšwa ka mokgwa woo pele ga lena, go lokile, a le ka se kgone go Mo dumela? Nnete. E nong go ba le tumelo bjale gomme le dumele.

A nke ke no lebelela go dikologa, ke bone mo Moya wo Mokgethwa o tla nketellago pele, se A tlogo go se dira. Ga ke tsebe gore O tla dira eng, go tšwa go Yena. Eupša ge feela le ka no ba le tumelo, dumela feela, “Dilo ka moka di a kgonega go ba ba dumelago.” A ka moka ga lena le dumela seo, emišetšang diatla tša lena godimo gomme le re, “Ke a Le dumela.” [Phuthego e re, “Ke a Le dumela.”—Mor.] Ka pelo ya ka ka moka, ke a Le dumela.

170 Bjale tharo e tla ba go tiišetša, ge A e dira makga a mararo go otlologa, go kgonthiša go lena gore Le a rereša. Ga ke kgathale mo o lego, gore o mang, e no ba le tumelo gomme o dumele. Bjale, le se ke—le se ke la šišinyega go dikologa. Ka tsela *ye*.

171 Mohumagadi, yo a rapelago, ga ke go tsebe. E no dula moo o lego; ga wa swanela go tla. Ga ke go tsebe, eupša o swere mosetsana yo monnyane ka seatleng sa gago, goba ka difarong tša gago. Ke nna mosetsebje wa go feela go wena. Gomme mosetsana yo monnyane o bonala a itekanetše, o bonala a le gabotse. Ke mosetsana yo monnyane yo mobotsana, mosetsana yo monnyane wa hlogo ye khubedu. Ke lebeletše mo go yena, ga a lebelelege o ka re o golofetše goba eng kapa eng. Ga ke tsebe gore bothata ke eng ka yena. E ka no se be ka ngwana; e ka no ba ka wena. Eupša ke nno direga go go bona o dutše fao le ngwana yoo, gomme o rapela. Ke swanetše go bolela le wena motsofotso, go swara moya wa gago, go swana le ka mo Jesu a dirilego go mosadi, “Ntlišetše sa go nwa,” le a bona, feela go no eleletša—eleletša motho yo motee. Ngwanešu Bryant le bona ba dutše mo, ke tseba batho ba ba dutšego mo. Ba ka no ba ba na le senyakwa, le bona, eupša o be o le mosetsebje.

172 A o a ntumela go ba moporofeta wa Modimo? A o a dumela gore dilo tše o di kwelego bošegong bjo ke Therešo? Bjale, ge Modimo a utolla go nna selo se sengwe se o se dirilego, goba selo se sengwe o bego o se wa swanela go be o se dirile, goba selo se sengwe sa go fošagala ka wena, goba seo e lego kganyogo ya gago, o tla tseba ge eba ke therešo goba aowa. A o ka se ke? Gomme ge A ka dira seo, a se tla tiišetša Lentšu la Gagwe gore O a swana maabane, lehono, le ka gosafelego, le gore Mokgetwa Luka 17:30 e a bonagatšwa? O a Le dumela?

173 Bjale, mohumagadi o emišitše seatla gore re basetsebane. Ga ke go tsebe, eupša ke leka go kgoma moya wa gagwe, motho yo motee. Fao go na le ba bantši ba lena ba ba gogago. Bjale, o dumela Le ka pelo ya gago ka moka.

Bjale, ke ka mosetsana yo monnyane. Ga se wena. O na le letšhogo le le go tshwenyago, eupša ga se letšhogo le le go tshwenyago. Selo se segolo godimo ga pelo ya gago ke mosetsana yo monnyane yoo. Gomme a o a dumela gore Modimo a ka kgona go mpotša gore ke eng? O a se dumela? A se tla go thuša, a gona o ka dumela? Ke kgobalo ya bjoko. Seo ke therešo? Bjale bea seatla sa gago godimo ga hlogo ya ngwana; seatla sa gago.

174 Morategi Modimo, O rile, “Maswao a a tla latela bona ba ba dumelago. Ba tla bea diatla tša bona godimo ga balwetši, gomme ba tla fola.” Mosadi ke modumedi. Seatla sa gagwe se godimo ga ngwana. A nke a fole. Leineng la Jesu Kriste, ke neela thapelo ye. Amene.

175 Bjale a le a dumela, ka moka ga lena? Ge le ka kgona go dumela, dilo ka moka di a kgonega. Nnete!

176 Ke tseba mohumagadi yo a dutšego kgauswi le yena, eupša o lebeletše ka tsela ye ka tlhokofalo. Ga ke kgone go bitša leina la gagwe, eupša ke. . . Ge ke mo lebelela motsotso, ke tla tseba. Eupša ke tseba mosadi ka tebelelo, eupša ga ke tsebe gore bothata bja gago ke eng. O a dumela gore ke. . . Modimo o tla ntira gore ke tsebe gore bothata bja gago ke eng? A o ka. . . A se tla go thuša? Bolwetši bja swikiri. Bjale, ge seo e le therešo, swara seatla sa gago. Nnete!

177 Go diregile go ba mohumagadi yo a robetšego. . . a dutšego kgauswi le wena, o na le selo se se swanago. Ke mosetsebje. Mohumagadi yo mongwe o rapelela yo mongwe, ngwana wa go golofala. O dumela ka pelo ya gago ka moka, Modimo o tla e fa.

178 Yo mongwe morago mo. Monna yo a dutšego godimo fao, o leka go fediša go kgoga disekerete. O a dumela gore Modimo o tla di tšea go di tloša go wena? Ka moka gabotse. O a dumela? O ka kgona go e hwetša. Ga se ka ke ka bona monna bophelong bja ka.

179 Monna šo. Le bona morithi wo moso wo o lekeletšego bogodimo ga monna yo thwi mo yo a robetšego godimo ga sa go swana le koloyana, goba setulo? O a hwa. O apešitšwe ke morithi. O na le kankere. Ga ke tsebe monna, ga se ka ke ka mmona. Modimo o tseba ka moka ka wena. Seo ke therešo, mohlomphegi. O a dumela gore Modimo a ka kgona go mpotša selo se sengwe ka wena? A se ka go thuša go amogela phodišo ya gago? [Ngwanešu o re, “Eye, ke a dira.”—Mor.] O tlišitšwe mo ke mogwera. Eupša ga o tšwe mo, o felotsoko fao go nago le mmele wo mogolo wa meetse mo batho ba theago dihlapu gona. [“Ya.”] Ya, Albany, Kentucky. [“Yeo ke therešo.”] Yeo ke therešo. Dumela, gomme o ka kgona go ya morago gae, o lokile. Dumela gore e tlogile. Ge o tla Le dumela! O swanetše go Le dumela, gomme o dumele gore e diretšwe wena. O a dumela?

<sup>180</sup> Wena, o tšwa Tennessee, o na le mošemane yo a nago le asema. Go a mo, eupša o a dumela gore o tla fodišwa? Gona tšeela sakatuku sa gago, sa gago. . . ka seatleng sa gago fao, go yena. O tla fodišwa ge o ka Le dumela.

<sup>181</sup> Mohumagadi yo a llogo, yo a dutšego go kgabaganya go tloga go Ngaka Vayle fao. O apešitšwe ke morithi, le yena, morithi wo moso. Ga se kake ka bona mosadi ka bophelong bja ka, eupša o na le kankere. O tla hwa ge selo se sengwe se sa dirwe go yena. O a dumela gore O tla go fodiša, mohumagadi? O ka kgona? O ka kgona go ba le phodišo ya gago, ge o ka no dumela.

<sup>182</sup> Fale go na le mohumagadi yo monnyane o dutše thwi ka morago ga gagwe le sakatuku godimo ga molomo wa gagwe. Le yena o na le alsa ya mala, o a babja. O bile le mahloko a go idibatša, go fofala, go wela ntle. Yo mongwe o go tlišitše mo. O na le bothata bja sesadi. Ge o ka dumela, o ka kgona go ya gae, wa loka.

<sup>183</sup> Wena, monna yo moswa, ke wena mosetsebje; o dutše thwi mo ka pele ga ka, o ntebeletše. A o mang, Mopoerto Rican goba selo se sengwe? Ya, se ke se rago, . . .? . . .! Ke nna mosetsebje go wena. O tseba seo; ebile ga o tšwe go naga ya gešu. Eupša o a dumela gore Modimo a ka kgona go go fa tumo ya pelo ya gago? Ge nka go botša gore tumo ya gago ke eng, a o ka e amogela? O nyaka kolobetšo ya Moya wo Mokgethwa. Seo ke therešo. Amogela Moya wo Mokgethwa, ngwanešu wa ka.

<sup>184</sup> Šo monna wa mokhalate o dutše morago mo, o na le morwalo pelong ya gagwe. Ke bakeng sa mosadi wa gagwe. Ga a mo, le bjalo. O na le bothata ka maoto a gagwe. O a dumela gore O tla mo fodiša? O a dira? Ke wena mosetsebje mo. O tšwa go kgabaganya lewatle. O tšwa Jamaica. O a dumela gore Modimo a ka kgona go mpošša gore o mang? Mna. Brady. O a dumela? Jesu Kriste o a swana maabane, lehono, le ka gosafelego.

<sup>185</sup> Mohumagadi yo a dutšego morago ka kua mafelelong a, kgauswi le Mdi. Wright fao, o na le morwalo godimo ga pelo ya gagwe. O rapelela morwedi. O godimo go ya ophareišene. O dumela ka pelo ya gago ka moka, bakeng sa gagwe? A ka se ke a e nyaka ge o mo dira gore a Le dumele. Ga ke kgone go fodiša.

<sup>186</sup> Tsela morago ka kua bofepelong, ke bona Moya wa Morena, Morongwa, Seetša se sepela ka bofepelong. Se godimo ga mosadi yo moswa, gomme o na le bothata bja semoya a makalago ka bjona. Go bonala o ka re ke swanetše go tseba mosadi, go le bjalo, mosadi yo moswa. Gape o na le go golofala ga bosadi. Eye. Leina la gagwe ke Mdi. West, go tšwa Alabama, Mdi. David West. Dumela; Modimo o tla e fa go wena.

<sup>187</sup> “Go tla ba Seetša, gomme ka letšatšing leo ge Morwa wa motho a utollwa.” Ge e se Jesu Kriste wa go swana maabane, lehono, le ka gosafelego, ga ke tsebe selo ka Lona. A le dumela Leo? Ka moka dilo di a kgonega go bona ba ba dumelago.



<sup>188</sup> Ka ntle godimo maekorofouneng go kgabanya naga bjale, le ka mo tabarenekeleng ye, ke ba bakae ba lena le ka emišago diatla gomme la re, “Ke nna modumedi”? Bjale, lena ka ntle fao ka dinageng, yo mongwe le yo mongwe o na le diatla tša bona godimo, mo. Gomme tsela ntle, ka kua felotsoko go kgabola setšhaba, le na le diatla tša lena godimo, ntle le go kamaka. Bjale tswalelang mahlo a lena, e no ušetša diatla tša gago godimo ga yo mongwe kgauswi le wena. Tšeang go swara seatla sa bona. Se bee godimo ga legetla la bona. Ke na le diatla tša ka godimo ga disakatuku. Lebelelang se se dirilwego lehono! Lebelelang se se dirilwego bjale.

Bonang sefahlego sa Gagwe sa ntikudiku  
 Se kganya ka lerato Kgethwa;  
 Bašegofatšwa batšeakarolo ba mogau wa  
 Gagwe,  
 Wa mabjebohlokwa koroneng ya Gagwe a  
 kganya.

Bjale rapela. A re rapeleng, mo gohle.

<sup>189</sup> Morategi Modimo, iri e fihlile. Se se ra go reng? Modimo o phethagatša Lentšu la Gagwe! Kgogedi ke eng, Morena? Ke Modimo o phethagatša Lentšu la Gagwe. Ke eng se ka ntle go kgabaganya setšhaba, ka go kgabaganya ka founo, fao makgolo a batho ba nago le diatla tša bona godimo ga yo motee go yo mongwe go kgabaganya setšhaba, go tloga lebopong le letee go ya go le lengwe, go tloga Lebowa go ya Borwa, Bohlabela go ya Bodikela? Fa go dutše batho mo go tšwa dinageng tša ka ntle, tše dingwe tša dilete, Mexico, Canada, gomme re na le diatla tša rena di beilwe godimo ga yo motee go yo mongwe. Modimo o phethagatša Lentšu la Gagwe!

<sup>190</sup> Go bjang ka se gore motho a ka kgona go ema mo ka Moya wo Mokgethwa gomme a bitša monna go swana le ka mo A dirilego Simone Petro, “Leina la gago ke Simone, o morwa wa Jona”?

“Sepela go bitša monna wa gago gomme le tle mo.”

“Ga ke na le monna.”

“Ka therešo. O na le ba bahlano.”

<sup>191</sup> A re, “Ke a tseba gore Mesia o tla go dira se, eupša Wena o Mang?”

A re, “Ke nna Yena.”

<sup>192</sup> Gomme O a swana maabane, lehono, le ka gosafelego. Gomme O tshephišitše, “Mediro ye Ke e dirago le tla e dira le lena. Le tla dira le ye e fetago ye, ka baka la gore Ke ya go Tate.” “Gomme, bonang, ka matsatšing a mafelelo ke tla romela Eliya, moporofeta, gomme o tla fetola megopolo ya batho, a retollela dipelo tša bana morago go Thuto ya baapostola ya Beibele.” “Gomme go tla ba Seetša ka nako ya mantšibuwa.”

193 Ke rena ba, Modimo yo mogolo wa Legodimo! Iri e mo! Diatla di godimo ga batho.

194 Sathane, o fentšwe. O na le maaka. Gomme, bjalo ka mohlanka wa Modimo, gomme bjalo ka bahlanka, re laela gore Leineng la Jesu Kriste, gore o obamele Lentšu la Modimo, gomme o tšwele ka ntle ga batho, ka baka la gore go ngwadilwe, “Leineng la Ka ba tla rakela bodiabololo ntle.”

195 Gomme gore ka moka batho ba lokollwe. E fe, Morategi Modimo. O Modimo wa Legodimo yo a fentšego, ka letšatši lela ka kgogedi godimo ga Thaba ya Khalibari, ka moka go babja le malwetši le ka moka mediro ya diabololo. O Modimo. Gomme batho ba a fodišwa ka megogoma ya Gago. Ba lokologile. Leineng la Jesu Kriste. Amene.

196 Modimo, sakatuku se sengwe le se sengwe se se robotšego mo, ge Moya wa Modimo o sale gona, ge tlotšo ya Jesu Kriste e sa le godimo ga batho, gomme maswao a magolo ao A a tshephišitšego a phethagatšwa, gomme lefase le tlhagasele, ditšhišinyego tša lefase e a direga, maswao a magolo ao A a boletšego, gomme Lengwalo le a phethagatšwa, gomme Seetša sa mantšibuwa se a kganya. Ke bea mmele wa ka go kgabaganya disakatuku tše, go emela mmele wohle wo wa badumedi go tšwa Bohlabela, Bodikela, Lebowa, le Borwa; gomme re re go diabololo, “Leineng la Jesu Kriste, tlogela molwetši yo mongwe le yo mongwe yo tše di bewago godimo ga gagwe,” bakeng sa tlhompho le letago la Lentšu la Modimo. Leineng la Lentšu la Modimo, Jesu Kriste wa Natsaretha. Amene.

197 Bjale, ka go homola, go tšea gabotse, go hlapogelwa, le ka go menagano ya lena ya maleba, bjalo ka badumedi, a bjale le a dumela gomme le amogela phodišo ya lena go tšwa go Modimo Ramaatlakamoka, Leineng la Jesu Kriste? Ge le dira, swareleng diatla tša lena godimo. Ka moka ntle ka dinageng, swareleng diatla tša lena godimo fao. Motho yo mongwe le yo mongwe ka mo, bokgole bjo ke kgonago go bo bona, ba bile le diatla tša bona godimo; ka gare, ka ntle, go ipata ka mafasetere, ka mejako, ka bofefelong, le ka moka go dikologa mo gohle, batho ka diatla tša bona godimo. Ba a Le amogela. Sathane o fentšwe! Megogoma ya Jesu Kriste e a go fodiša, gomme Bogona bja Jesu Kriste bo kgonthiša ntlha ya gore O a phela lehono, ka moka go boloka tshephišo ye nngwe le ye nngwe A e dirilego. Amene! Ke a Mo dumela. A ga le dire? [Phuthego e re, “Amene.”—Mor.]

198 Bjale a re emeleleng ka maoto a rena. Leineng la Morena Jesu, re amogela selo se sengwe le se sengwe seo se dirilwego goba se boletšwego, re Mo rata ka dipelo tša rena ka moka. Re Mo tlotla ka ka moka tše di lego ka go rena. Bjale ge le eya magaeng a lena a go fapana go tloga bošegong bjo, Modimo a ye le lena. Modimo a le fe Moya wo Mokgethwa ge le se na Moya wo Mokgethwa.

199 Monna yo mongwe le yo mongwe, mosadi, mošemane, goba mosetsana, mo, yo a sego a kolobetšwa Leineng la Jesu Kriste, dikobo šidile, mogobe. O se ke wa beela bosasa se se ka kgonago go dirwa lehono. Bosasa go ka no ba go latile kudu. “Go lekanela ga lehono, ka letšatši, ke diabololo wa gona.” Badiredi šebale ba eme, ba letile, diaparo di letile. Ga go maitshwarelelo. A le letile? Ge o, o dumela. Ga go kgathale gore o kolobeditšwe bjang, o fafaditšwe, o golobeletšwe, eng kapa eng e lego yona, ke phošo. Seetša se tlile. Etna, dumela, gomme o kolobetšwe.

200 Yo mongwe le yo mongwe a se nago Moya wo Mokgethwa, a o ka amogela Moya wo Mokgethwa, yo mongwe le yo mongwe wa lena, ka maatleng a Makgethwa le lerato le A go tshephišitšego lona, go go dira sebopša se seswa ka go Yena. Modimo a le šegofatše.

201 Bjale, go fihla Lamorena le le latelago mosong ka masometharo go tšwa go senyane, a re opeleng kopelo ye re bego re fela re e opela mengwaga ya go feta.

Se lebale thapelo ya lapa,  
 Jesu o nyaka go gahlana nago fao;  
 O tla tšea tlhokomelo ye nngwe le ye nngwe  
 ya gago,  
 Se lebale thapelo ya lapa.

A re e opeleng mmogo bjale.

Se lebale thapelo ya lapa,  
 Jesu o nyaka go gahlana nago fao;  
 O tla tšea tlhokomelo ye nngwe le ye nngwe  
 ya gago,  
 Oo, se lebale thapelo ya lapa.

202 Bjale ge re e opela gape, šišinya diatla tša gago le moeti kgauswi le wena, le a bona, ge re e opela.

Se lebale thapelo ya lapa,  
 Oo, Jesu o nyaka go gahlana nago fao;  
 O tla tšea tlhokomelo ye nngwe le ye nngwe  
 ya gago,  
 Oo, se lebale thapelo ya lapa.

203 A ga le Mo rate? Ke a Mo rata. Ke a Mo rata ka baka la gore O nthatile pele gomme a patela phološo ya ka (yeo e be e le kgogedi) godimo ga Thaba ya Khalibari. Kgogedi ye e swanago godimo ga Thaba ya Sunset, Thaba ya Nebo, Thaba ya Sinai, ka moka maitemogelo a go fapana a ntlhoraneng ya thaba. Ka gona, ka moka gabotse, a re e opeleng.

Ke a Mo rata, ke a Mo rata  
 Gobane O nthatile pele  
 Gomme a pa- . . . phološo  
 Godimo ga mohlare wa Khalibari.

204 Ka moka ba ba Mo ratago, e reng, “Amene.” [Phuthego e re, “Amene.”—Mor.] A go be bjalo! Bjale e no nagana se A go


diretšego sona; nagana, gore o be o ka kgona go ba kua ntle ka kamoreng ya para bošegong bjo. Gabotse nkabe o le ka lebitleng go swana le ka fao nkabego, ka ntle ga megau ya Modimo. A O go diretše eng? Oo, re ka kgona bjang go tlogela go Mo rata? Ga e dire phapano gore yo mongwe o reng, Ke wa mathomo.

205 A re tswaleleng mahlo a rena, gomme re kobamiše dihlogo tša rena ge re Mo opella gona bjale. O rata dikopelo, go opela dipina. A re Mo opelleng yona bjale.

Ke a Mo rata, ke a Mo rata  
Gobane O nthatile pele  
Gomme a patella phološo ya ka  
Godimo ga mohlare wa Khalibari.

206 Ka dihlogo tša rena le dipelo di kobamišitšwe ka Bogoneng bja Gagwe, go leboga se mahlo a rena a se bonego, seo ditsebe tša rena di se kwelego, seo se rekotilwego ka Lentšung la Modimo, seo tshephišo ya Gagwe e bego e le sona go rena lehono. Modimo a le šegofatše.

207 Re na le mo—moeng le rena bošegong bjo, ngwanešu, Ned Iverson, a bego a le modiredi wa Presbyterian. Tatagwe, bana babo, ke modiredi wa Presbyterian. O, ke a kwišiša, o kolobeditšwe lehono, gape, Leineng la Jesu Kriste. Ke modiredi, yo mokaone ka go yeo. Gomme bjale ke ya go mo kgopela, bjalo ka ge ke mo dumela go ba mohlanka wa Modimo, go kgopela ditšhegofatšo tša Modimo godimo ga phuthego ye ge o eya lagaeng la gago.

208 Ngwanešu Iverson, etla pele, ge re sa na le dihlogo tša rena di kobilwe ka thapelo. Modimo a go šegofatše, ngwanešu wa ka. 

*KGOGEDI KE ENG GODIMO GA THABA? NST65-0725E*

(What Is The Attraction On The Mountain?)

Molaetša wo ka Ngwanešu William Marrion Branham, mathomong o abilwe ka Seisimane ka Lamorena manthapama Julae 25, 1965, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho tlhathollo e ngwadilwe gomme ya phatlalatšwa ke Voice of God Recordings.

NORTH SOTHO

©2016 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)